

T ChL 2720.1132


CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

SEP 20 1982

78

朝史年表傳第百九十五卷至百九十九卷

外國三四五六



明史彙

列傳第一百九十六

光祿大夫

經筵講官明史總裁戶部尚書加七級

臣

王鴻緒奉

敕編撰

外國三

日本

哈佛大學
圖書館
珍藏印

日本古倭奴國唐咸亨中改日本以近東海日出而名也地
環海惟東北限大山有五畿七道三島共一百十五州統五
百八十七郡其小國數十皆服屬焉國小者百里大不過五
百里戶小者千多不過一二萬國主世以王為姓羣臣亦世
官宋以前皆通中國朝貢不絕事具前史惟元世祖數遣使
趙良弼招之不至乃命忻都范文虎等帥舟師十萬征之至

五龍山遭暴風軍盡沒後屢招不至終元世未相通也明興
乘中國用兵屢寇濱海州縣洪武二年三月遣行人楊載齋
詔書以卽位告且詰其入寇之故謂宜朝則來庭不則修兵
自固倘必爲寇盜卽命將徂征耳王其圖之日本王良懷不
奉命侵掠如故三年三月又遣萊州府同知趙秩齋詔招諭
秩泛海至析木崖入其境守關者拒弗納秩以書抵良懷乃
延秩入秩諭以中國威德而詔書有責其不臣語良懷曰吾
國雖處扶桑東未嘗不慕中國惟蒙古以小邦視我我先王
以爲我與彼等爾乃欲臣妾我而使其臣趙姓者詠我以好
語初不知其覘國也旣而水軍十萬已環列海岸賴天地之
靈震雷疾風水軍盡覆自是不通中國今新天子帝中夏天

使亦趙姓豈昔蒙古之裔邪亦將詠以好語而襲我也曰左
右將刃之秩不爲動徐曰我大明天子神聖文武非蒙古比
我亦非蒙古使者後爾若悖逆不吾信卽先殺我爾之禍亦
不旋踵且天命所在人孰能違我朝以禮懷爾豈可與蒙古
之誑言襲爾者比邪於是良懷氣沮下堂延秩禮遇甚優乃
遣其僧祖來奉表箋稱臣貢馬及方物且送還明台二郡被
掠人口七十餘以四年十月至京太祖嘉之宴賚其使者念
其俗佞佛可以西方教誘之也乃命僧祖闡克勤等八人送
使者還國賜良懷大統曆及文綺紗羅祖闡等旣至爲其國
演教其國人頗敬信而王則傲慢無禮拘之二年以七年五
月還京時良懷年少有持明者與之爭立國內亂是年七月

其大臣遣僧宣聞溪等齋書上中書省貢馬及方物而無表
帝命却之仍賜其使者遣還未幾其別島守臣氏久遣僧奉
表來貢帝以無國王之命且不奉正朔亦却之而賜其使者
命禮官移牒責以越分私貢之非又以頻入寇掠命中書移
牒責之乃以九年四月遣僧圭廷用等來貢且謝罪帝惡其
表詞不誠降詔戒諭宴賚使者如制十二年來貢十三年復
貢無表但持其征夷將軍源義滿奉丞相書至書詞又倨慢
乃却其貢遣使齋詔譙讓十四年復來貢帝再却之而命禮
官移書責其王并責其征夷將軍示以欲征之意良懷上言
臣聞三皇立極五帝禪宗惟中華之有主豈夷狄而無君乾
坤浩蕩非一主之獨權宇宙寬洪作諸邦以分守蓋天下者

乃天下之天下非一人之天下也臣居遠弱之倭褊小之國
城池不滿六十封疆不足三千尚存知足之心陛下作中華
之主爲萬乘之君城池數千餘封疆百萬里猶有不足之心
常起滅絕之意夫天發殺機移星換宿地發殺機龍蛇走陸
人發殺機天地反覆昔堯舜有德四海來賓湯武施仁八方
奉貢臣聞天朝有興戰之策小邦亦有禦敵之圖論文有孔
孟道德之文章論武有孫吳韜略之兵法又聞陛下選股肱
之將起精銳之師來侵臣境水澤之地山海之洲自有其備
豈肯跪途而奉之乎順之未必其生逆之未必其死相逢於
賀蘭山前聊以博戲臣何懼哉倘君勝臣負且滿上國之意
設臣勝君負反作小邦之羞自古講和爲上罷戰爲強免生

靈之塗炭拯黎庶之艱辛持遣使臣敬叩丹陛惟上國圖之
帝得表愠甚終鑑蒙古之轍不加兵也十九年遣使來貢却
之明年命江夏侯周德興往福建濱海四郡相視形勢衛所
城不當要害者移置之民戶三丁取一以充戍卒乃築城一
十六增巡檢司四十五得卒萬五千餘人又命信國公湯和
行視浙東西諸郡整飭海防乃築城五十九民戶四丁以上
者以一為戍卒得五萬八千七百餘人分戍諸衛海防大飭
閩六月命福建備海舟百艘廣東倍之以九月會浙江捕倭
既而不行先是胡惟庸謀逆欲藉日本為助乃厚結寧波衛
指揮林賢佯奏賢罪謫居日本令交通其君臣尋奏復賢職
遣使召之密致書其王借兵助已賢還其王遣僧如瑤率兵

卒四百餘人詐稱入貢且獻巨燭藏火藥刀劍其中既至而
惟庸已敗計不行帝亦未知其狡謀也越數年其事始露乃
族賢而惡日本特甚決意絕之專以防海為務然其時王子
滕祐壽者來入國學帝猶善待之二十四年五月特授觀察
使留之京師後著祖訓列不征之國十五日本與焉自是朝
貢不至而海上之警亦漸息成祖即位遣使以登極詔諭其
國永樂元年又遣左通政趙居任行人張洪偕僧道成往將
行而其貢使已達寧波禮官李至剛奏故事番使入中國不
得私攜兵器鬻民宜敕所司嚴其舶諸犯禁者悉籍送京師
帝曰外夷修貢履險路危來遠所費實多有所齎以助資斧
亦人情豈可槩拘以禁令至其兵器亦準時直市之母阻向

化十月使者至上王源道義表及貢物帝厚禮之遣官偕其使還賚道義冠服龜鈕金章及錦綺紗羅明年十一月來賀册立皇太子時對馬臺岐諸島賊掠濱海居民因諭其王捕之王發兵盡殲其衆繫其魁二十人以三年十一月獻於朝且修貢帝益嘉之遣鴻臚少卿潘賜偕中官王進賜其王九章寬服及錢鈔錦綺加等而還其所獻之人令其國自治之使者至寧波盡置其人於甌丞殺之明年正月又遣侍郎俞士吉齎璽書褒嘉賜賚優渥封其國之山爲壽安鎮國之山御製碑文立其上六月使來謝賜寬服五年六年頻入貢且獻所獲海寇使還請賜仁孝皇后所製勸善內訓二書卽命各給百本十一月再貢十二月其國世子源義持遣使來告

父喪命中官周全往祭賜諡恭獻且致賻又遣官齋敕封義持爲日本國王時海上復以倭警告再遣官諭義持勦捕八年四月義持遣使謝恩尋獻所獲海寇帝嘉之明年二月復遣王進齋敕褒賚收市物貨其君臣謀阻進不使歸進潛登舶從他道遁還自是久不貢至十五年有捕倭寇數十人至京者廷臣請正法帝曰威之以刑不若懷之以德宜還之乃命刑部員外郎呂淵等齋敕責讓令悔罪自新中華人被掠者亦令送還明年四月其王遣使隨淵等來貢謂海寇旁午故貢使不能上達其無賴鼠竊者實非臣所知願貸罪容其朝貢帝以其詞順許之禮使者如故然海寇猶不絕十七年六月遼東總兵官劉江大破之於望海埚自是寇掠爲稀貢

使亦不至宣德七年正月帝念四方蕃國皆來朝獨日本久不貢命中官柴山往琉球令其王轉諭日本賜之敕明年夏王源義教遣使來帝報之賚白金綵幣秋復至十年十月以英宗嗣位遣使來貢正統元年二月使者還賚王及妃銀幣四月工部言宣德間日本諸國皆給信符勘合今改元伊始例當更給從之四年五月倭船四十艘連破台州桃渚寧波大嵩二千戶所又陷昌國衛大肆殺掠八年五月寇海寧先是洪熙時黃巖民周來保龍巖民鍾普福困於徭役叛入倭倭每來寇爲之鄉導至是導倭犯樂清先登岸傾伺俄倭去二人留村中丐食被獲置極刑梟其首於海上倭性黠時載方物戎器出沒海濱得聞則張其戎器而肆侵掠不得則陳

其方物而稱朝貢東南海濱患之景泰四年入貢至臨清掠居民貨有指揮往詰毆幾死所司請執治帝恐失遠人心不許先是永樂初詔日本十年一貢人止二百船止二艘不得攜軍器違者以寇論乃賜以二舟爲入貢用後悉不如制宣德初申定要約人毋過三百舟毋過三艘而倭人貪利貢物外所攜私物增十倍例當給直禮官言宣德間所貢硫黃蘇木刀扇漆器之屬估時直給錢鈔或折支布帛爲數無多然已大獲利今若仍舊制當給錢二十一萬七千銀價如之宜大減其直給銀三萬四千七百有奇從之使臣不悅請如舊制詔增錢萬猶以爲少求增賜物詔增布帛千五百終怏怏去天順初其王源義政以前使臣獲罪天朝蒙恩宥欲遣使

謝罪而不敢自達移書朝鮮王令轉請朝鮮以聞廷議敕朝鮮覈實令擇老成識大體者充使不得仍前肆擾既而貢使亦不至成化四年夏乃遣使貢馬謝恩禮之如彝典其通事三人自言本寧波村民幼爲賊掠市與日本今請便道省祭許之戒其勿令使臣至家引中國人下海十一月使臣清啓復來貢傷人於市有司請治其罪詔付清啓奏言犯法者當用本國之刑容還國如法論治且自服不能鈐束之罪帝俱赦之自是使者益無忌矣十三年九月來貢求佛祖通紀諸書詔以法苑珠林賜之使者述其王意請於常例外增賜命賜錢五萬貫二十年十一月復貢弘治九年三月王源義高遣使來還至濟寧其下復持刀殺人所司請罪之詔自今止

許五十人入都餘留舟次嚴防禁焉十八年冬來貢時武宗已卽位命如故事鑄金牌勘合給之正德四年冬來貢禮官言明年正月大祀慶成宴朝鮮陪臣在殿東第七班日本向無例請列殿西第七班從之禮官又言日本貢物向用舟三今止一所賜銀幣宜如其舟之數且無表文賜敕與否請上裁命所司移文荅之五年春其王源義澄遣使臣宋素卿來貢時劉瑾竊柄納其黃金千兩賜飛魚服前所未有也素卿鄞縣朱氏子名縞幼習歌唱倭使見而悅之而縞叔澄負其直因以縞償至是充正使至蘇州澄與相見後事覺法當死劉瑾庇之謂澄已自首竝獲免七年義澄使復來貢浙江守臣言今畿輔山東盜充斥恐使臣遇之爲所掠請以貢物貯

浙江官庫收其表文送京師禮官會兵部議請令南京守備官卽所在宴賚遣歸附進方物皆予全直毋阻遠人向化心從之嘉靖二年五月其貢使宗設抵寧波未幾素卿偕瑞佐復至互爭真僞市舶中官賴恩納素卿賄宴時坐素卿於宗設上船後至又先爲驗發宗設怒與之鬪殺瑞佐焚其舟追素卿至紹興城下素卿匿他所免兇黨還寧波所過焚掠執指揮袁璉奪船出海都指揮劉錦追至海上戰歿巡按御史歐珠以聞且言據素卿狀西海路多羅氏義興者向屬日本統轄無入貢例因貢道必經西海正德朝勘合爲所奪我不得已以弘治朝勘合由南海路起程比至寧波因詰其僞致啓釁章下禮部部議素卿言未可信不宜聽入朝但釁起宗

設素卿之黨被殺者多其前雖有投番罪已經先朝宥赦毋容問惟宣諭素卿還國移咨其王令察勘合有無行究治帝已報可御史熊蘭給事張翀交章言素卿罪重不可貸請并治賴恩及海道副使張芹分守參政朱鳴陽分巡副使許完都指揮張浩閉關絕貢振中國之威寢狡寇之計事方議行會宗設黨中林望古多羅逸出之舟爲暴風飄至朝鮮朝鮮人擊斬三十級生擒二賊以獻給事中夏言因請逮赴浙江會所司與素卿雜治因遣給事中劉穆御史王道往至四年獄成素卿及中林望古多羅竝論死繫獄久之皆瘐死時有琉球使臣鄭繩歸國命傳諭日本以擒獻宗設還袁璉及海濱被掠之人否則閉關絕貢徐議征討九年琉球使臣蔡瀚

者道經日本其王源義晴附表言向因本國多事干戈梗道正德勘合不達東都以故素卿捧弘治勘合行乞貸遣望并賜新勘合金印修貢如常禮官驗其文無印篆言倭謫詐難信宜救琉球王傳諭仍遵前命十八年七月義晴貢使至寧波守臣以聞時不通貢者已十七年敕巡按御史督同三司官覈果誠心效順如制遣送否則却回且嚴居民交通之禁明年二月貢使碩鼎等至京申前請乞賜嘉靖新勘合還素卿及原留貢物言官論其不可命禮部會兵刑二部都察院協議僉言勘合不可遽給務繳舊易新貢期限十年人不過百舟不過三餘不可許詔如部臣議二十三年七月復來貢未及期且無表文部臣謂不當納却之其人利互市留海濱

不去巡按御史高節請治沿海文武將吏罪嚴禁奸豪交通得旨允行而內地諸奸利其交易多爲之囊橐終不能盡絕二十六年六月巡按御史楊九澤言浙江寧紹台溫皆濱海連延福建福興漳泉諸郡有倭患雖設衛所城池及巡海副使備倭都指揮但海寇出没無常兩地官弁不相統攝制禦爲難請如往例特遣巡視重臣盡統濱海諸郡庶事權歸一威令易行廷議稱善乃命副都御史朱統巡撫浙江兼制福興漳泉建寧五府軍事未幾其王義晴遣使周良等先期來貢用舟四人六百泊於海外以待明年貢期守臣沮之則以風爲解十一月事聞帝以先期非制且人船越額敕守臣勒回十二月倭賊犯寧台二郡大肆殺掠二郡將吏竝獲罪明

年六月周良復求貢統以聞禮部言日本貢期及舟與人數雖違制第表辭恭順去貢期亦不遠若槩加拒絕則航海之勞可憫若猥務含容則宗設宋素卿之事可鑒宜敕統循十八年例起送五十人餘留嘉賓館量加犒賞諭令歸國若互市防守事宜在統善處之而已報可統力言五十人過少乃令百人赴都部議但賞百人餘罷勿賞良訴貢舟高大勢須五百人中國商舶入海往往藏匿島中爲寇故增一舟防寇非敢違制部議量增其賞且謂百人之制彼國勢難遵行宜相其貢舟大小以施禁令從之日本故有孝武兩朝勘合幾二百道使臣前此入貢請易新者而令繳其舊至是良持弘沿勘合十五道言其餘爲素卿子所竊捕之不獲正德勘合

留十五道爲信而以四十道來還部議令吳時悉繳舊乃許易新亦報可當是時日本王雖入貢其各島諸倭歲常侵掠竝海奸民又往往勾之統乃嚴爲申禁獲交通者不俟命輒以便宜斬之由是浙閩大姓素爲倭內王者失利而怨統又數騰疏於朝顯言大姓通倭狀以故閩浙人咸惡之而閩尤甚巡按御史周亮閩產也上疏詆統請改巡撫爲巡視以殺其權其黨在朝者左右之竟如其請後又奪統官羅織其擅殺罪統自殺自是不置巡撫者四年海禁復弛亂益滋甚祖制浙江設市舶提舉司以中官主之駐寧波海舶至則平其直制馭之權在上及世宗盡撤天下鎮守中官并撤市舶而濱海奸人遂操其利初猶市商人爲之主已而嚴通番之禁

遂移之貴官家而負其直者愈甚索之急則以危言嚇將吏
俾之勦兵將出又以好言給之走謂吾終不負若直倭喪其
賞不得返已大恨而大奸若汪直徐海陳東麻葉輩素窟穴
其中者以內地不得逞悉逸出海島中爲之謀主倭悉聽其
指揮誘之入寇而海中巨盜遂襲倭服飾旂號竝分艘掠內
地無不利由是倭患日劇於是廷議復設巡撫三十一年
七月乃以僉都御史王忬任之而勢已不可撲滅先是明初
沿海要地建衛所設戰船董以都司巡視副使等官控制周
密及承平久船敵伍虛及遇警乃募漁船以資哨守兵非素
練船非專業見寇船至輒望風逃匿而上又無統率御之以
故賊帆所指無不殘破三十二年三月汪直勾諸倭大舉入

寇連艦數百蔽海而至浙東西江南北濱海數千里同時告
警破昌國衛四月犯太倉破上海縣掠江陰攻乍浦八月劫
金山衛犯崇明及常熟嘉定三十三年正月自太倉掠蘇州
攻松江復趨江北薄通泰四月陷嘉善破崇明復薄蘇州入
崇德縣六月由吳江掠嘉興還屯柘林縱橫來往若入無人
之境忬亦不能有所爲未幾忬改撫大同以李天寵代之又
命兵部尚書張經總督軍務乃大徵兵四方協力進剿是時
倭以川沙窪柘林爲巢抄掠四出明年正月賊奪舟犯乍浦
海寧陷崇德轉掠塘棲新市橫塘雙林等處攻德清縣五月
復合新倭突犯嘉興至王江涇乃爲經擊斬一千九百餘級
餘奔柘林其他倭復肆掠蘇州境延及江陰無錫出入太湖

莫有禦之者大抵直倭十之三從倭者十之七倭戰則驅其所掠之人爲軍鋒法嚴人皆致死而官軍素懷怯所至潰奔帝乃遣工部侍郎趙文華督察軍情文華夢顛倒功罪諸軍益解體經天寵竝被逮代以周琬胡宗憲踰月琬罷代以楊宜時賊勢蔓延江南北浙東西旣無不遭其蹂躪新倭來益衆益肆毒每自焚其舟登岸劫掠自杭州北新關西剽淳安突徽州歙縣至績谿旌德過涇縣趨南陵遂達蕪湖燒南岸奔太平府犯江寧鍾徑侵南京倭紅衣黃蓋整衆犯大安德門及夾岡乃趨秣陵關而去由溧水流劫溧陽宜興聞官兵自太湖出遂越武進抵無錫駐惠山一晝夜奔一百八十餘里抵滄墅爲官軍所圍追及於楊林橋殲之是役也賊不過

六七十人而經行數千里殺戮戰傷者幾四千人歷八十餘日始滅此三十四年九月事也應天巡撫曹邦輔以捷聞文華忌其功以倭之巢於陶宅也乃大集浙直兵與宗憲親將之又約邦輔合勦分道竝進營於松江之甌橋倭悉銳來衝遂大敗文華氣奪賊益熾十月倭自樂清登岸流劫黃巖仙居奉化餘姚上虞被殺擄者無算至嵎縣乃殲之亦不滿二百人顧深入三府歷五十日始平其先一枝自山東日照流劫東安衛至淮安贛榆沐陽桃源至清河阻雨爲徐邳官兵所殲亦不過數十人流害千里殺戮千餘其悍如此而文華自甌橋之敗見倭寇勢甚其自柘林移於周浦與泊於川沙有嘉定高橋者自如他侵犯者無虛日文華乃以寇息

請還朝明年二月罷宜代以宗憲以阮鶚巡撫浙江於是宗憲乃請遣使諭日本國王禁戢島寇招還通番奸商許立功免罪既得旨遂遣寧波諸生蔣洲陳可願往及是可願還言至其國五島遇汪直毛海峰謂日本內亂王與其相俱死諸島不相統攝須徧諭乃可杜其入犯又言有薩摩洲者雖已揚帆入寇非其本心乞通貢互市願殺賊自効乃留洲傳諭各島而送可願還宗憲以聞兵部言直等本編民既稱効順卽當釋兵乃絕不言及第求開市通貢隱若屬國然其奸叵測宜令督臣振揚國威嚴加備禦移檄直等俾勦除舟山諸賊巢以自明果海疆廓清自有恩賚從之時兩浙皆被倭而慈谿焚殺獨慘餘姚次之浙西柘林乍浦烏鎮皂林間又皆

爲賊巢前後至者二萬餘人命宗憲亟圖方略七月宗憲言賊首毛海峰自陳可願還一敗倭寇於舟山再敗之瀝表又遣其黨招諭各島相率効順乞加重賞部令宗憲以便宜行當是時徐海陳東麻葉方連兵攻圍桐鄉宗憲設計間之海遂擒東葉以降盡殲其餘衆於乍浦未幾復蹴海於梁莊海亦授首餘黨盡滅江南浙西諸寇略平而江北倭則犯丹陽及掠瓜洲燒漕艘者明春復犯如臯海門攻通州掠揚州高郵入寶應遂侵淮安府集於廟灣逾年乃克其浙東之倭則盤踞於舟山亦先後爲官軍所襲先是蔣洲宣諭諸島至豐後被留轉令僧人往山口等島傳諭禁戢於是山口都督源義長具咨送還被掠人口而咨乃用國王印豐後太守源義

鎮遣僧德陽等具方物奉表謝罪請頒勘合修貢送洲還前
楊宜所遣鄭舜功出海哨探者行至豐後島島主亦遣僧清
授附舟來謝罪言前後侵犯皆中國奸商潛引諸島夷眾義
鎮等實不知於是宗憲疏陳其事言洲奉使二年止歷豐後
山口二島或有貢物而無印信勘合或有印信而非國王名
稱皆違朝典然彼既以貢來又送還被掠人口實有畏罪乞
恩意宜禮遣其使令傳諭義鎮義長轉諭日本王擒獻倡亂
諸渠及中國奸宄方許通貢詔可汪直之踞海島也與其黨
王激葉宗滿謝和王清溪等各擁眾誘挾倭寇為雄朝廷至
懸伯爵萬金之賞以購之迄不能致及是內地官軍頗有備
倭雖橫亦多被勦戮有全島無一人歸者往往多尤直直漸

不自安宗憲與直同郡館直母與其妻孥於杭州遣蔣洲齎
其家書招之直知家屬固無恙頗心動義鎮等以中國許互
市亦喜乃裝巨舟遣其屬善妙等四十餘人隨直等來貢市
於三十六年十月初抵舟山之岑港將吏以為入寇也陳兵
備直乃遣王激入見宗憲謂我以好來何故陳兵待我激即
毛海峰直養子也宗憲慰勞甚至指心誓無他俄善妙等見
副將盧鏜於舟山鏜令擒直以獻語洩直益疑宗憲開諭百
方直終不信曰果爾可遣激出吾當入見宗憲立遣之直又
邀一貴官為質即命指揮夏正往直以為信遂與宗滿清溪
偕來宗憲大喜禮接之甚厚令謁巡按御史王本固於杭州
本固以屬吏激等聞大恨支解夏正焚舟登山據岑港堅守

逾年新倭大至屢寇浙東三郡其在岑港者徐移之柯梅造新舟出海宗憲不之追十一月賊揚帆南去泊泉州之浯嶼掠同安惠安南安諸縣攻福寧州破福安寧德明年四月遂圍福州經月不解福清永福諸城皆被攻燬蔓延於興化奔突於漳州其患盡移於福建而潮廣間亦紛紛以倭警聞矣至四十年浙東江北諸寇以次平宗憲尋坐罪被逮明年十一月陷興化府大殺掠移據平海衛不去初倭之犯浙江也破州縣徭所城以百數然未有破府城者至是遠近震動亟徵俞大猷戚繼光劉顯諸將合擊破之其侵犯他州縣者亦爲諸將所破福建亦平其後廣東巨寇曾一本黃朝太等無不引倭爲助隆慶時破碣石甲子諸衛所已犯化州石城縣

陷錦囊所神電衛吳川陽江茂名海豐新寧惠來諸縣悉遭焚掠轉入雷廉瓊三郡境亦被其患萬曆二年犯浙東寧紹台溫四郡又陷廣東銅鼓衛雙魚所三年犯電白四年犯定海八年犯浙江韭山及福建彭湖東湧十年犯溫州又犯廣東十六年犯浙江然時疆吏懲嘉靖之禍海防頗飭賊來輒失利其犯廣東者爲蜚賊梁本豪勾引勢尤猖獗總督陳瑞集衆軍擊之斬首千六百餘級沈其船百餘艘本豪亦授首帝爲告謝郊廟宣捷受賀云日本故有王其下稱關白者最尊顯時山城州渠信長爲此職偶出獵遇一人臥樹下驚起衝突執而詰之自言爲平秀吉薩摩洲人之奴雄健躡捷有口辨信長見而悅之令牧馬名曰木下人後漸用事爲信長

畫策奪并二十餘州遂為攝津鎮守大將有參謀阿奇支者得罪信長命秀吉統兵討之俄信長為其下明智所弑秀吉方攻滅阿奇支聞變與部將行長等乘勝還兵誅之威名益振尋廢信長三子僭稱關白盡有其眾時為萬曆十四年於是益治兵征服六十六州又以威脅琉球呂宋暹羅佛郎機諸國皆使奉貢乃改國王所居山城為大閣廣築城郭建宮殿其樓閣有至九重者實婦女珍寶其中其用法嚴軍行有進無退違者雖子婿必誅以故所向無敵乃改元文祿并欲侵中國滅朝鮮而有之召問故時汪直遺黨知唐人畏倭如虎氣益驕益大治甲兵繕舟艦與其下謀入中國北京者用朝鮮人為導入浙閩沿海郡縣者即用唐人為導慮琉球洩

其情使母入貢同安人陳甲者商於琉球懼其為中國害也與琉球長史鄭迴謀因進貢請封之使其以其情來告甲又旋故鄉陳其事於巡撫趙參魯參魯以聞下兵部部移咨朝鮮王王但深辨嚮導之誣亦不自知其謀已也初秀吉廣徵諸鎮兵儲三歲糧欲自將以犯中國會其子死旁無兄弟前奪豐後島王妻為妾慮其為後患而諸鎮怨秀吉之虐已也咸曰此舉非侵大唐乃襲我耳各懷異志由是秀吉不敢親行二十年四月遣其將清正行長義智僧元蘇宗逸等將舟師數百艘由對馬島渡海陷朝鮮之金山乘勝長驅以五月渡臨津掠開城分陷豐德諸郡朝鮮望風潰清正等遂逼王京朝鮮王李昖棄城奔平壤又奔義州遣使絡繹告急倭遂

入王京執其王妃王子追奔至平壤放兵淫掠七月命副總
兵祖承訓赴援與倭戰於平壤城外大敗承訓僅以身免八
月中朝乃以兵部侍郎宋應昌為經略都督李如松為提督
統兵討之當是時寧夏未平朝鮮事起兵部尚書石星計無
所出募能說倭者偵之於是嘉興人沈惟敬應募星即假游
擊將軍銜送之如松麾下明年如松師大捷於平壤朝鮮所
失四道竝復如松乘勝趨碧蹄館敗而退師於是封貢之議
起中朝彌縫惟敬以成款局事詳朝鮮傳久之秀吉死諸倭
揚帆盡歸朝鮮患亦平然自關白侵東國前後七載喪師數
十萬糜餉數百萬中朝與朝鮮迄無勝算至關白死兵禍始
休諸倭亦皆退守島巢東南稍有安枕之日矣秀吉凡再傳
而亾終明之世通倭之禁甚嚴而閭巷小民至指倭相詈罵
甚以噤其小兒女云

四史彙

卷第一百六十六

其以禁其小良文云

而山嶽四之可斷對之禁其嶺而問其小良生計對其置置

明史彙

列傳第一百九十七

光祿大夫 經筵講官明史總裁戶部尚書加七級臣王鴻緒奉
敕編撰

外國四

琉球

呂宋

合貓里

美洛居

沙瑤訥囉囉

雞籠

婆羅

麻葉窶一作麻
逸來

古麻刺朗

馮嘉施蘭

文郎馬神

琉球居東南大海中自古不通中國元世祖遣官招諭之不
能達太祖洪武初其國有三王曰中山曰山南曰山北皆以
尚為姓而中山最强五年正月命行人楊載以即位建元詔

告其國其中山王察度卽遣弟泰期等隨載入朝貢方物帝喜賜大統曆及文綺紗羅其使者亦有賜七年冬泰期復來貢并上皇太子箋命刑部侍郎李浩齋賜文綺陶鐵器且以陶器七萬鐵器千就其國市馬九年夏泰期隨浩入貢得馬四十匹浩言其國不貴統綺惟貴磁器鐵釜自是賞賚多用諸物明年遣使賀正且貢馬十六匹硫黃千斤又明年復貢其山南王承察度亦遣使朝貢禮賜如中山十五年春中山來貢遣內官送其使還國明年與山南王竝來貢詔賜二王鍍金銀印時二王與山北王爭雄互相攻伐命內史監丞梁民賜之勅令罷兵息民三王竝奉命山北王怕尼芝卽遣使偕二王使朝貢十八年又貢賜山北王鍍金銀印如二王而

賜二王海舟各一自是三王屢遣使奉貢而中山王尤數二十三年中山來貢其通事私攜乳香十斤胡椒三百斤入都爲門者所獲當入官詔還之仍賜以鈔二十五年夏中山貢使以其王從子及寨官子偕來請肄業國學從之賜衣巾靴襪并夏衣一襲其冬山南王亦遣從子及寨官子入國學賜賚如之自是歲賜冬夏衣以爲常明年中山兩入貢又遣寨官子肄業國學是時國法嚴中山生與山南生有非議詔書者帝聞置之死而待其國如故山北王怕尼芝已卒其嗣王攀安知二十九年春遣使來貢令山南生肄業國學者歸省其冬復來中山亦遣寨官子二人及女官生始魯妹二人先後來肄業其感慕華風如此中山又遣使請賜冠帶命禮部繪

圖令自製其王固以請乃賜之并賜其臣下冠服又嘉其修職勤賜閩中舟工三十六戶以便貢使往來建文帝嗣位遣官以登極詔諭其國三王亦奉貢不絕成祖承大統詔諭如前永樂元年春三王並來貢山北王請賜冠帶詔給賜如山命行人邊信劉克齋勅使三國賜以絨錦文綺紗羅明年二月中山王世子武寧使使告父喪命禮部遣官論祭賻以布帛遂命武寧襲位四月山南王從弟王應祖亦使使告承察度之喪謂前王無子傳位應祖乞加朝命且賜冠帶帝竝從之遂遣官冊封時山南使臣私齎白金詣處州市磁器事發當論罪帝曰遠方之人知求利而已安知禁令悉貫之三年山南遣寨官子入國學明年中山亦遣寨官子六人入國

學并獻奄豎數人帝曰彼亦人子無罪刑之何忍命禮部還之部臣言還之慮阻歸化之心請但賜勅止其再進帝曰諭以空言不若示以實事今不遣還彼欲獻媚必將繼進天地以生物爲心帝王乃可絕人類乎竟還之五年四月中山王世子思紹使使告父喪論祭賜賻冊封如前儀八年山南遣官生三人入國學賜巾服靴條衾褥帷帳已復頻有所賜一日帝與羣臣語及之禮部尚書呂震曰昔唐太宗興庠序新羅百濟竝遣子來學爾時僅給廩餼未若今日賜予之周也帝曰蠻彝子弟慕義而來必衣食常充然後嚮學此我太祖美意朕安得違之明年中山遣國相子及寨官子入國學因言右長史王茂輔翼有年請擢爲國相左長史朱復本江西

饒州人輔臣祖察度四十餘年不懈今年踰八十請令致仕還鄉從之乃命復茂竝爲國相復兼左長史致仕茂兼右長史任其國事十一年中山遣寨官子十三人入國學時山南王應祖爲其兄達勃期所弑諸寨官討誅之推應祖子他魯每爲主以十三年三月請封命行人陳季若等封爲山南王賜誥命冠服及寶鈔萬五千錠琉球之分三王也惟山北最弱故其朝貢亦最稀自永樂三年入貢後至是年四月始入貢其後竟爲二王所并而中山益強以其國富一歲常再貢三貢天朝雖厭其繁不能却也其冬貢使還至福建擅奪海舶殺官軍且毆傷中官掠其衣物事聞戮其爲首者餘六十七人付其主自治明年遣使謝罪帝待之如初其修貢亦益

謹二十二年春中山王世子尙巴志來告父喪諭祭賜賻如常儀仁宗嗣位命行人方彝詔告其國洪熙元年命中官齋勅封巴志爲中山王宣德元年其王以冠服未給遣使來請命製皮弁服賜之三年八月帝以中山王朝貢彌謹遣官齋勅往勞賜羅錦諸物山南自四年兩貢終帝世不復至亦爲中山所并矣自是惟中山一國朝貢不絕正統元年其使者言初入闕時止具貢物報聞下人所齋海肥螺殼失於開報悉爲官司所沒入致來往乏資乞賜垂憫命給直如例明年貢使至浙江典市舶者復請籍其所齋帝曰番人以貿易爲利此二物取之何用其悉還之著爲令使者奏本國陪臣冠服皆國初所賜歲久敝壞乞再給又言小邦遵奉正朔而海

道險遠受曆之使或半歲一歲始返常懼後時帝曰冠服令本邦自製大統曆福建布政司給予之七年正月中山世子尚忠來告父喪命給事中余忭行人劉遜封忠為中山王勅使之用給事中自茲始也忭等還受其黃金沉香倭扇之贈為偵事者所覺竝下吏杖而釋之十二年二月世子尚思達來告父喪命給事中陳傳行人萬祥往封景泰二年思達卒無子其叔父金福攝國事遣使告喪命給事中喬毅行人童守宏封金福為王五年二月金福弟泰久奏長兄金福殂次兄布里與兄子志魯爭立兩傷俱殞所賜印亦毀壞國中臣民推臣權攝國事乞再賜印鎮撫遠藩從之明年四月命給事中嚴誠行人劉儉封泰久為王天順六年三月世子尚德

來告父喪命給事中潘榮行人蔡哲封為王成化五年其貢使蔡璟言祖父本福建南安人為琉球通事傳至璟擢長史乞如制賜誥贈封其父母章下禮官以無例而止明年福建按察司言貢使程鵬至福州與指揮劉玉私通貨賄竝宜究治命治玉而宥鵬七年三月世子尚圖來告父喪命給事中丘弘行人韓文封為王弘至山東病卒命給事中官榮代之十年貢使至福建殺懷安民夫婦二人焚屋劫財捕之不獲明年復貢禮官因請定令二年一貢毋過百人不得附攜私物騷擾道塗帝從之賜勅戒王其使者請如祖制比年一貢不許又明年貢使至會冊立東宮請如朝鮮安南賜詔齋回禮官議琉球與日本占城竝居海外例不頒詔乃降勅以文

錦綵幣賜其王及妃十三年使臣來復請比年一貢不許明年四月王卒世子尙真來告喪乞嗣爵復請比年一貢禮官言其國連章奏請不過欲圖市易而已近年所遣之使多繫閩中連逃罪人殺人縱火奸狡百端專貿中國之貨以擅外蕃之利所請不可許乃命給事中董旻行人張祥往封而不從其請十六年使來復引祖訓條章請比年一貢帝賜勅戒約之十八年使者至復以爲言賜勅如初使者攜陪臣子五人來受學命隸南京國子監二十二年貢使來其王移咨禮部請遣五人歸省帝卽遣之弘治元年七月其貢使自浙江來禮官言貢道向由福建今旣非正道又非貢期宜却之詔可其使臣復以國王移禮部文來上言舊歲知東宮冊妃故

遣使來賀非敢違制禮官乃請納之而稍減僉從賜賚以示裁抑之意三年使者至言近歲貢使止許二十五人入都物多人少慮致疎虞詔許增五人其僉從在閩者并增給二十人廩食爲一百七十人時貢使所攜土物與閩人互市者爲奸商抑勒有司又從而侵削之使者訴於朝有詔禁止十七年遣使補貢謂小邦貢物常市之滿刺加因遭風致失期命宴賚如制正德二年使者來請比年一貢禮官言不可許是時劉瑾亂政特許之五年遣官生蔡進等五人入南京國學嘉靖二年從禮官議勅琉球二年一貢如舊制不得過百五十人五年尙真卒其世子尙清以六年來貢因報訃使者還至海溺死九年遣他使來貢并請封帝從禮官言命福建守

臣勘報至十一年世子以國中臣民狀來上乃命給事中陳侃行人高澄持節往封及還却其贈十四年貢使至仍以所贈黃金四十兩進於朝乃勅侃等受之二十九年來貢攜陪臣子五人入國學三十六年貢使來告王尙清之喪先是倭寇自浙江敗還抵琉球境世子尙元遣兵邀擊大殲之獲中國被掠者六人至是送還帝嘉其忠順賜賚有加卽命給事中郭汝霖行人李際春封尙元爲王至福建阻風未行三十年其貢使亦至福建稱受世子命以海中風濤叵測倭寇又出沒無時恐天使有他慮請如正德中封占城故事遣人代進表文方物而身偕本國長史齎回封冊不煩天使遠臨巡按御史樊獻科以聞禮官言遣使冊封祖制也今使者欲

遙受冊命是委君貺於草莽不可一使者本奉表朝貢乃求遣官代進是棄世子專遣之命不可二昔正德中占城王爲安南所侵竄居他所故使者齎回勅命出一時權宜今援失國之事以擬其君不可三梯航通道柔服之常彼所藉口者倭寇之警風濤之險爾不知琛寶之輸納使臣之往來果何由而得無患乎不可四曩占城雖領封其王猶懇請遣使今使者非世子面命又無印信文移若輕信其言倘世子以遣使爲至榮遙拜爲非禮不肯受封復上書請使將誰執其咎此不可五也乞命福建守臣仍以前詔從事若夫未受封而先謝恩亦非故事宜止聽其入貢其謝恩表文俟世子受封後遣使上進庶中國之大體以全帝如其言元旣受封以四

十一年夏遣使入貢謝恩明年及四十四年竝入貢隆慶中凡三貢皆送還中國飄流人口天子嘉其忠誠賜勅獎勵加賚銀幣萬曆元年冬其國世子尙永遣使告父喪請襲爵章下禮部行福建守臣覈奏明年冬遣使賀登極三年入貢四年春再貢七月命戶科給事中蕭崇業行人謝杰齋勅及皮弁冠服玉珪封尙永爲中山王明年冬崇業等未至世子復遣使入貢其後修貢如常儀八年冬遣陪臣子三人入南京國學十九年遣使來貢而尙永隨卒禮官以日本方侵噬鄰境琉球不可無王乞令世子速請襲封用資鎮壓從之二十三年其世子尙寧遣人請襲福建巡撫許孚遠以倭氛未息據先臣鄭曉領封之議請遣官一員齋勅至福建聽其陪臣

面領歸國或遣習海武臣一人偕陪臣同往禮官范謙議如其言且請待世子表至乃許至二十八年世子以表至其陪臣請如祖制遣官禮官余繼登言累朝冊封琉球伐木造船動經數歲使者蹈風濤之險小國苦供億之煩宜一如前議從事帝可之命今後冊封止遣廉勇武臣一人偕請封陪臣前往其祭前王封新王禮儀一如舊章仍命俟彼國大臣結狀至乃行明年秋貢使以狀至請仍遣文臣乃命給事中洪瞻祖行人王士禎往且命待海寇息警乃渡海行事已而瞻祖以憂去改命給事中夏子陽以三十一年二月抵福建而按臣方元彥復以海上多事警報頻仍會巡撫徐學聚疏請仍遣武臣子陽士禎則以屬國言不可爽使臣義當有終乞

堅成命慰遠人章俱未報而禮部侍郎李廷機言宜行領封
初旨并武臣不必遣於是御史錢桓給事中蕭近高交章爭
其不可謂此事當在欽命未定之前不當在冊使既遣之後
宜勅所司速成海艘勿悞今歲渡海之期俟竣事復命然後
定爲畫一之規先之以文告令其領封海上永爲遵守帝納
之三十二年七月乃命子陽等速渡海竣事當是時日本方
強有吞滅之意琉球外禦強鄰內修貢不絕至四十年日本
果以勁兵三千入其國擄其王遷其宗器大掠而去浙江總
兵官楊宗業以聞乞嚴飭海上兵備從之已而其王釋歸復
遣使修貢然其國殘破已甚禮官乃定十年一貢之例明年
修貢如故又明年再貢福建守臣遵朝命却還之其使者快

快而去四十四年日本有取雞籠山之謀其地名臺灣密邇
福建尙寧遣使以聞詔海上警備至天啟三年尙寧已卒其
世子尙豐遣使請貢請封禮官言舊制琉球二年一貢後爲
倭寇所破改期十年今其國休養未久暫擬五年一貢俟新
王冊封更議從之五年遣使入貢請封六年再貢是時中國
多事而科臣應使者亦憚行故封典久稽崇禎二年其貢使
又至請封命遣官如故事禮官何如寵復以履險糜費請令
陪臣領封帝不從乃命戶科給事中杜三策行人楊掄往成
禮而還四年秋遣使賀東宮冊立自是迄崇禎末竝修貢如
儀後兩京繼沒唐王立於福建猶遣使奉貢其虔事天朝爲
外藩最云

呂宋居南海中去漳州甚近洪武五年正月使使偕瑣里諸國來貢永樂三年十月遣官齎詔撫諭其國八年與馮嘉施蘭入貢自後久不至萬曆四年官軍追海寇林道乾至其國國人助討有功復朝貢時佛郎機強與呂宋互市久之見其國弱可取乃奉厚賄遺王乞地如牛皮大建屋以居王不虞其詐而許之其人乃裂牛皮聯屬至數千丈圍呂宋地乞如約王大駭然業已許諾無可奈何遂聽之而稍徵其稅如國法其人既得地卽營室築城列火器設守禦具爲窺伺計已竟乘其無備襲殺其王逐其人民而據其國名仍呂宋實佛郎機也先是閩人以其地近且饒富商販者至數萬人往往久居不返至長子孫佛郎機既奪其國其王遣一酋來鎮慮

華人爲變多逐之歸留者悉被其侵辱二十一年八月酋郎雷敝裏系勝侵美洛居役華人二百五十助戰有潘和五者爲其哨官蠻人日酣卧而令華人操舟稍怠輒鞭撻有至死者和五曰叛死筆死等死耳否亦且戰死曷若刺殺此酋以救死勝則揚帆歸不勝而見縛死未晚也衆然之乃夜刺殺其酋持酋首大呼諸蠻驚起不知所爲悉被刃或落水死和五等盡收其金寶甲仗駕舟以歸失路之安南爲其國人所掠惟郭惟太等三十二人附他舟獲返時酋子郎雷猶吝駐朔霧聞之率衆馳至遣僧陳父冤乞還其戰艦金寶戮仇人以償父命巡撫許孚遠聞於朝檄兩廣督撫以禮遣僧置惟太於理和五竟留安南不敢返初酋之被戮也其部下居呂

宋者盡逐華人於城外毀其廬及猫客歸卽令城外築室以居會有傳日本來寇者猫客懼交通爲患復議驅逐而乎遠適遣人招還蠻乃給行糧遣之然華商嗜利趨死不顧久之復成聚其時礦稅使者四出奸宄盜起言利有閭應龍張疑者言呂宋機易山素產金銀採之歲可得金十萬兩銀三十萬兩以三十年七月詣闕奏聞帝卽納之命下舉朝駭異都御史溫純疏言近中外諸臣爭言礦稅之害天聽彌高今雲南李鳳至汙辱婦女六十六人私運財賄至三十巨舟三百大扛勢必見戮於積怒之衆何如及今撤之猶不失威福操縱之柄緬酋以寶井故提兵十萬將犯內地西南之蠻岌岌可憂而閩中奸徒又以機易山事見告矣此其妄言眞如戲

劇不意皇上之聰明而悞聽之臣等驚魂搖曳寢食不寧異時變興禍起費國家之財不知幾百萬倘或剪滅不早其患又不止費財矣臣聞海澄市舶高宗已歲徵三萬金決不遺餘力而讓利卽機易越在海外亦決無徧地金銀任人採取之理安所得金十萬銀三十萬以實其言不過假借朝命闢出禁物勾引諸番以逞其不軌之謀豈止煩擾公私貽害海澄一邑而已哉昔年倭患正緣奸民下海私通大姓設計勒價致倭賊憤恨稱兵犯順今以朝命行之害當彌大及乎兵連禍結諸奸且效汪直曾一本輩故智負海稱王擁兵列寨近可以規重利遠不失爲尉佗於諸亾命之計得矣如國家大患何乞急寘於理用消禍本言官金忠士曹于汴朱吾弼

等亦連章力爭皆不聽事下福建守臣持不欲行而迫於朝命乃遣海澄丞王時和百戶干一成偕巖往勘呂宋人聞之大駭華人流寓者謂之曰天朝無他意特奸徒橫生事端今遣使者按驗俾奸徒自窮便於還報耳其酋意稍解命諸僧散花道旁若敬朝使而盛陳兵衛逐之時和等入酋爲置宴問曰天朝欲遣人開山山各有主安得開譬中華有山可容我國開耶且言樹生金豆是何樹所生時和不能對數視巖疑曰此地皆金何必問豆所自其上下皆大笑留巖欲殺之諸華人共解乃獲釋歸時和還任卽病悸死守臣以聞請治巖妄言罪事已止矣而呂宋人終自疑謂天朝將襲取其國諸流寓者爲內應潛謀殺之明年聲言發兵侵旁國厚價市

鐵器華人貪利盡出而鬻之於是家無寸鐵酋乃下令錄華人姓名分三百人爲一院人卽殲之事稍露華人乃羣走菜園酋發兵攻衆無兵仗死無算奔大崙山蠻人復來攻衆殊死鬪蠻兵少挫酋旋悔遣使議和衆疑其偽撲殺之酋大怒斂衆入城設伏城旁衆飢甚悉下山攻城伏發衆大敗先後死者二萬五千人酋尋出令諸所掠華人貲悉封識貯庫移書閩中守臣言華人將謀亂不得已先之請令死者家屬往取其孥與帑巡撫徐學聚等亟告變於朝帝驚悼下法司議奸徒罪三十二年十二月議上帝曰巖等欺誑朝廷生豐海外致二萬商民盡膏鋒刃損威辱國死有餘辜卽梟首傳示海上呂宋酋擅殺商民撫按官議罪以聞學聚等乃移檄呂

宋數以擅殺罪令送死者妻子歸竟不能討也其後華人復稍稍往而蠻人利中國互易亦不拒久之復成聚時佛郎機已併滿刺加益以呂宋勢愈強橫行海外遂據廣東香山澳築城以居與民互市而患復中於粵矣

合猶里海中小國也土瘠多山山外大海饒魚蟲人知耕稼永樂三年九月遣使附瓜哇使臣朝貢其國又名貓里務近呂宋商舶往來漸成富壤華人入其國不敢欺凌市法最平故華人爲之語曰若要富須往貓里務有網巾礁老者最兇悍海上行劫舟若飄風遇之無免者然特惡商舶不至其地偶有至者待之甚善貓里務後遭寇掠人多死傷地亦貧困商人慮爲礁老所劫鮮有赴者

美洛居俗訛爲米六合居東海中頗稱饒富酋出威儀甚備所部合掌伏道旁男子削髮女椎結地有香山雨後香墮沿流滿地居民拾取不竭其酋委積充棟以待商舶之售東洋不產丁香獨此地有之可以辟邪故華人多市易萬曆時佛郎機來攻其酋戰敗請降乃宥令復位歲以丁香充貢不設戍兵而去已紅毛番橫海上知佛郎機兵已退乘虛直抵城下執其酋語之曰若善事我我爲若主殊勝佛郎機也酋不得已聽命復位如故佛郎機曾聞之大怒率兵來攻道爲華人所殺語具呂宋傳時紅毛番雖據美洛居率一二歲率衆返國旣返復來佛郎機曾子旣襲位欲竟父志大舉兵來襲值紅毛番已去遂破美洛居殺其酋立已所親信主之無何

紅毛番至又破其城逐佛郎機所立會而立美洛居故王之
子自是歲歲構兵人不堪命華人流寓者游說兩國令各罷
兵分國中萬老高山為界山以北屬紅毛番南屬佛郎機始
稍休息而美洛居竟為兩國所分

沙瑤與訥啤連壤訥啤連在海畔沙瑤稍紆人山隈皆與
呂宋近男女蓄髮椎結男子用履婦女跣足以板為城豎木
覆茅為室崇釋教多建禮拜寺男女之禁甚嚴夫行在前其
婦與人嘲笑夫即刃其婦所嘲笑之人不敢逃任其刺割盜
不問大小輒論死孕婦將產以水灌之且以水滌其子置水
中生而與水習矣物產甚薄華人商其地所攜僅磁器鍋釜
之類重者至布而止後佛郎機據呂宋多侵奪鄰境惟二國

號令不能及

雞籠山在澎湖嶼東北故名北港又名東番去泉州甚邇地
多深山大澤聚落星散無君長有十五社社多者千人少或
五六百人無徭賦以子女多者為雄聽其號令雖居海中酷
畏海不善操舟老死不與鄰國往來永樂時鄭和徧歷東西
洋靡不獻琛恐後獨東番遠避不至和惡之家貽一銅鈴俾
挂諸項蓋擬之徇國也其後人反寶之富者至掇數枚曰此
祖宗所遺俗尚勇暇即習走日可數百里不讓奔馬足皮厚
數分履荆棘如平地男女椎結裸逐無所避女或結草裙蔽
體遇長老則背身而立俟過乃行男子穿耳女子年十五斷
唇旁齒以為飾手足皆刺文眾社畢賀費不貲貧者不任受

賀則不敢刺四序以草青爲歲首土宜五穀而不善水田穀種落地則止殺謂行好事助天公乞飯食旣收穫卽標竹竿於道謂之插青此時逢外人便殺矣村落相仇刻期而後戰勇者數人前跳被殺則立散其勝者衆賀之曰壯士能殺人也其負者家衆亦賀之曰壯士不畏死也次日卽和好如初地多竹大至數拱長十丈以竹構屋覆之以茅廣且長聚族而居無曆日文字有大事集衆議之善用鏢鎗竹柄鐵鏃鈛甚試鹿鹿斃試虎虎亦斃性旣畏海捕魚則於溪澗冬月聚衆捕鹿鏢發輒中積如丘山獨不食雞雉但取其毛以爲飾中多大溪流入海水澹故其外名淡水洋嘉靖末倭寇擾閩大將戚繼光敗之何遁居於此其黨林道乾從之已道乾懼

爲倭所併又懼官軍追擊揚帆直抵淳泥攘其邊地以居號道乾港而雞籠遭倭焚掠國遂殘破始其人悉居海濱旣遭倭難稍稍避居山後忽中國漁舟從魍港飄至遂往來通販以爲常至萬曆末紅毛番泊舟於此因事耕鑿設關闌稱臺灣焉崇禎八年給事中何楷陳靖海之策言自袁進李忠楊祿楊策鄒芝龍李魁奇鍾斌劉香相繼爲亂海上無一歲寧息今欲靖寇氛非墟其窟不可其窟維何臺灣是也臺灣在澎湖島外距漳泉止兩日夜程地廣而腴初貧民時至其地規魚鹽之利後見兵威不及往往聚而爲盜近則紅毛築城其中與奸民互市屹然一大部落墟之之計非可干戈從事必嚴通海之禁俾紅毛無從牟利奸民無從得食出兵四犯

我師乘其虛而擊之可大得志紅毛舍此而去然後海氛可靖也時不能用其地北自雞籠南至浪嶠可一千餘里東自多羅滿西至王城可九百餘里水道順風自雞籠淡水至福州港口五更可達自臺灣港至澎湖嶼四更可達自澎湖至金門七更可達東北至日本七十更可達南至呂宋六十更可達蓋海道不可以里計舟人分一晝夜爲十更故以更計道里云

婆羅又名文萊東洋盡處西洋所自起也唐時有婆羅國高宗時常入貢永樂三年十月遣使者齎璽書綵幣撫諭其王四年十二月其國東西二王竝使使奉表朝貢明年又貢其地負山面海崇釋教惡殺喜施禁食豕肉犯者罪死王薙髮

裹金繡巾佩雙劍出入徒步從者二百餘人有禮拜寺每祭用犧厥貢玳瑁瑪瑙車渠珠白焦布花焦布降真香黃蠟黑小廝萬曆時爲王者閩人也或言鄭和使婆羅有閩人從之因留居其地其後人竟據其國而王之邸旁有中國碑王有金印一篆文上作獸形言永樂朝所賜民間嫁娶必請此印印背上以爲榮後佛郎機橫舉兵來擊王率國人走入山谷中放藥水流毒殺其人無算王得返國佛郎機遂犯呂宋麻葉甕在西南海中永樂三年十月遣使齎璽書賜物招諭其國其酋長迄不朝貢自占城靈山放舟順風十晝夜至交欄山其西南卽麻葉甕山峻地平田膏腴收穫倍他國煮海爲鹽釀蔗爲酒男女椎結衣長衫圍之以布俗尚節義婦喪

夫務面剃髮絕粒七日與屍同寢多致死七日不死則親戚
勸以飲食終身不再嫁或於焚屍日亦赴火自焚產玳瑁木
綿黃蠟檳榔花布之屬交欄山甚高廣饒竹木元史弼高興
伐瓜哇遭風至此山下舟多壞乃登山伐木重造遂破瓜哇
其病卒百餘留養不歸後益蕃衍故其地多華人又有葛卜
及速兒米囊二國亦永樂三年遣使持璽書賜物招諭竟不
至

古麻剌朗東南海中小國也永樂十五年九月遣中官張謙
齎勅撫諭其王幹刺義亦奔敦賜之絨錦紵絲紗羅十八年
八月王率妻子陪臣隨謙來朝貢方物禮之如蘇祿國王王
言臣愚無知雖爲國人所推然未受朝命幸賜封誥仍其國

號從之乃賜以印誥冠帶儀仗鞍馬及文綺金織襲衣妃以
下竝有賜明年正月辭還復賜金銀錢文綺紗羅綵帛金織
襲衣麒麟衣妃以下賜有差王還至福建遭疾卒遣禮部主
事楊善諭祭諡曰康靖有司治墳葬以王禮命其子刺苾嗣
爲王率衆歸賜鈔幣

馮嘉施蘭亦東洋中小國永樂四年八月其酋嘉馬銀等來
朝貢方物賜鈔幣有差六年四月其酋玳瑁里欲二人各率
其屬朝貢賜二人鈔各百錠文綺六表裏其從者亦有賜八
年復來貢

文郎馬神以木爲城其半倚山酋蓄繡女數百人出乘象則
繡女執衣履刀劍及檳榔盤以從或泛舟則酋跣坐牀上繡

女列坐其下與相向或用以刺舟威儀甚都民多縛木水上築室以居如三佛齊男女用五色布纏頭腹背多袒或著小袖衣蒙頭而入下體圍以縵初用蕉葉爲食器後與華人市漸用磁器尤好磁甕画龍其外死則貯甕中以葬其俗惡淫奸者論死華人與女通輒削其髮以女配之永不聽歸女苦髮短問華人何以致長給之曰我用華水沐之故長耳其女信之競市船中水以沐華人故斬之以爲笑端女或悅華人持香蕉甘蔗茉莉相贈遺多與之調笑然憚其法嚴無敢私通者其溪山中有村名烏籠里憚其人盡生尾見人輒掩面走避然地饒沙金商人持貨往市者擊小銅鼓爲號置貨地上卽引退丈許其人乃前視當意者置金於旁主者遙語欲售則持貨去否則懷金以歸不交言也所產有犀牛孔雀鸚鵡沙金鶴頂降香蠟藤席料藤草撥血竭肉荳蔻獐皮諸物鄰境有買哇柔者性兇很每夜半盜斬人頭以去裝之以金故商人畏之夜必嚴更以待始文郎馬神曾有賢德待商人以恩信子三十一人恐擾商舶不令外出其妻乃買哇柔會長之妹生子襲父位聽其母族之言務爲欺詐多負商人價直自是赴者亦稀

直自具法香衣鉢
具之救生于曩父世難其母其之言發為棋指多負商人罰
以恩討十三十一人恐難商賈不令收出其妻以買藥漆會
姑商人異之亦必親更以書故文須謀帳會百賀壽壽商人
漆竟百買起未清封以財每亦半益博人販以去裝之以金
誠必金難取利吞融融辣辣草餅血獸肉草藥藥史書
書限許資去否限對金以說不交言也祖率許軍中其軍

明史藁

列傳第一百九十八

光祿大夫 經筵講官明史總裁戶部尚書加七級 臣 王鴻緒奉

敕編撰

外國五

占城 賓童龍

真臘

暹羅

瓜哇 閩婆 磔里

蘇吉丹 日羅夏治

三佛齊

占城居南海中自瓊州航海順風一晝夜可至自福州西南
行十晝夜可至即周越裳地秦為林邑漢為象林縣後漢末
區連據其地始稱林邑王自晉至隋仍之唐時或稱占不勞
或稱占婆其王所居曰占城至德後改國號曰環迄周宋遂
以占城為號朝貢不替元世祖惡其阻命大舉兵擊破之亦

不能定洪武二年太祖遣官以卽位詔諭其國其王阿荅阿者先已遣使奉表來朝貢象虎方物帝喜卽遣官齎璽書大統曆文綺紗羅偕其使者往賜其王復遣使來貢自後或比歲貢或間歲或一歲再貢以爲常未幾命中書省管勾甘桓會同館副使路景賢齎詔封阿荅阿者爲占城國王賜綵幣四十大統曆三千三年遣使往祀其山川尋頒科舉詔於其國初安南與占城構兵天子爲遣使諭解而安南復相侵四年其王奉金葉表來朝長尺餘廣五寸刻本國字館人譯之其意曰大明皇帝登大寶位撫有四海如天地覆載日月照臨阿荅阿者譬一草木爾欽蒙遣使以金印封爲國王感戴忻悅倍萬恒情惟是安南用兵侵擾疆域殺掠吏民伏願皇

帝垂慈賜以兵器及樂器樂人俾安南知我占城乃聲教所被輸貢之地庶不敢欺陵帝卽命禮部諭之曰占城安南並事朝廷同奉正朔乃擅自構兵毒害生靈旣失事上之禮又乖交鄰之道已咨安南國王令卽日罷兵本國亦宜講信修睦各保疆土所請兵器於王何吝但兩國互構而賜占城是助爾相攻甚非撫安之義樂器樂人語音殊異難以遣發爾國有曉華言者其選擇以來當令肄習因命福建省臣勿徵其稅示懷柔之意六年貢使言海寇張汝厚林福等自稱元帥剽劫海上國王擊破之賊魁溺死獲其舟二十艘蘇木七萬斤謹奉獻帝嘉之命給賜加等其冬遣使獻安南之捷帝謂省臣曰去年安南言占城犯境今年占城謂安南擾邊未

審曲直可遣人往諭各罷兵息民毋相侵擾十年正月與安南王陳煊大戰煊敗死十二年九月貢使至都中書不以時奏帝切責丞相胡惟庸汪廣洋二人遂獲罪十月遣官賜王大統曆及衣幣令與安南修好罷兵十三年遣使賀萬壽節帝聞其與安南水戰不利賜敕諭之曰曩者安南兵出敗於占城之下占城乘勝入安南之國安南之辱已甚矣王能保境息民則福可長享如必驅兵苦戰勝負不可知而鷓蚌相持漁人得利他日悔之不亦晚乎十六年貢象牙二百枝及他方物遣官賜以勘合文冊又賜織金文綺三十二磁器萬九千十九年遣其子寶部領詩那日忽來朝賀萬壽節獻象五十四皇太子亦有獻帝嘉其誠賜賚優渥命中官送還明

年復貢象五十一匹及伽南犀角諸物帝既加宴賚還至廣東復命中官宴餞給道里費真臘貢象占城王奪其四之一其他失德事甚多帝聞之怒二十一年夏命行人董紹敕責之紹未至而其貢使抵京尋復遣使謝罪乃命宴賜如制是時阿荅阿者失道大臣閣勝懷不軌謀二十三年弒王自立明年遣太師奉表來貢帝惡其悖逆却之至三十年後復連入貢成祖卽位詔諭其國永樂元年其王占巴的賴奉金葉表朝貢且告安南侵掠請降敕戒諭帝可之遣行人蔣賓興王樞使其國賜以絨錦織金文綺紗羅明年以安南王胡奎奏詔戢兵遣官諭占城王而王遣使奏安南不遵詔旨以舟師來侵朝貢人回賜物悉遭掠奪又畀臣冠服印章俾爲臣

屬且已據臣沙離牙諸地更侵掠未已臣恐不能自存乞隸
版圖遣官往治帝怒敕責胡奎而賜占城王鈔幣四年貢白
象方物復告安南之難帝方大發兵往討乃敕占城嚴兵境
上逼其越軼獲者卽執送京師五年四月攻取安南所侵地
獲賊黨胡烈潘麻休等獻俘闕下因貢方物謝恩帝嘉其助
兵討逆遣中官王貴通齎敕及銀幣賜之六年鄭和使其國
王遣其孫舍楊該貢象及方物謝恩十年其貢使乞冠帶予
之復命鄭和使其國十三年王師方征陳季擴命占城助兵
尚書陳洽言其王陰懷二心愆期不進反以金帛戰象資季
擴季擴以黎蒼女遺之復約季擴舅陳翁挺侵升華府所轄
四州十一縣地厥罪維均宜遣兵致討帝以交趾初平不欲

勞師但賜敕切責俾還侵地王卽遣使謝罪十六年遣其孫
舍那挫來朝命中官林貴行人倪俊送歸有賜宣德元年行
人黃原昌往頒正朔繩其王不恪徂所酬金幣以歸擢戶部
員外郎正統元年瓊州知府程瑩言占城比年一貢勞費實
多乞如暹羅諸國例三年一貢帝是之敕其使如瑩言賜王
及妃綵幣然番人利中國市易雖有此令迄不遵六年王占
巴的賴卒其孫摩訶賁該以遺命遣王孫述提昆來朝貢且
乞嗣位乃遣給事中管腫行人吳惠齋詔封爲王新王及妃
並有賜七年春述提昆卒於途帝憫之遣官賜祭八年遣從
子且揚樂催貢舞牌旗黑象十一年敕諭摩訶賁該邇安南
王黎濬遣使奏王欺其孤幼曩已侵升華思義四州今又屢

攻化州掠其人畜財物二國俱受朝命各有分疆豈可興兵
構怨乖睦鄰保境之義王宜祇循禮分嚴飭邊臣毋恣肆侵
軼貽禍生靈并諭安南嚴行備禦毋挾私報復初定三年一
貢之例而其國不遵及詰其使者則云先王已逝前敕無存
今王不知此令是歲貢使復至再敕王遵制賜王及妃綵幣
其冬復遣使來貢十二年其王與安南戰大敗被執故王占
巴的賴姪摩訶貴來遣使奏先王抱疾曾以臣爲世子欲令
嗣位臣時年幼遜位於舅氏摩訶貴該後屢興兵伐安南致
敵兵入舊州古壘等處殺掠人畜殆盡王亦被擒國人以臣
先王之姪且有遺命請臣代位辭之再三不得已始於府前
治事臣不敢自尊伏候朝命乃遣給事中陳誼行人薛幹持

節封爲王諭以保國交鄰并諭國中臣民共相輔翼十三年
敕安南送摩訶貴該還國不奉命景泰三年遣使來貢且告
王訃命給事中潘本愚行人邊永封其弟摩訶貴由爲王天
順元年入貢賜其正副使鈸花金帶二年其王摩訶槃羅悅
新立遣使奉表朝貢四年復貢自正使以下賜紗帽及金銀
角帶有差使者訴安南見侵因爲敕諭安南王九月使來告
王喪命給事中黃汝霖行人劉恕封王弟槃羅茶全爲王八
年入貢憲宗已嗣位應頒賜蕃國錦幣禮官請付使臣齎回
從之其使者復訴安南見侵求索白象乞如永樂時遣官安
撫建立界牌碑石以杜侵陵兵部以兩國方爭不便遣使乞
令使臣歸諭國王務循禮法固封疆捍外侮毋輕構禍從之

成化五年入貢時安南索占城犀象寶貨令以事天朝之禮事之占城不從則大舉往伐以七年二月破其國執王槃羅茶全及家屬五十餘人劫印符大肆焚掠遂據其地王弟槃羅茶悅逃之山中遣使告難兵部言安南吞并與國若不爲處分非惟失占城歸附之心抑恐啟安南跋扈之志宜遣官齋敕宣諭還其國王及眷屬帝慮安南逆命令俟貢使至日賜敕責之八年以槃羅茶悅請封命給事中陳峻行人李珊持節往峻等至新州港守者拒之知其國已爲安南所據改爲交南州乃不敢入十年冬還朝安南旣破占城復遣兵執槃羅茶悅立前王孫齋亞麻弗菴爲王以國南邊地予之十四年遣使朝貢請封命給事中馮義行人張瑾往封之義等

多攜私物旣至廣東聞齋亞麻弗菴已死其弟古來遣使乞封義等慮空還失利亟至占城而占城人言王孫請封之後卽爲古來所殺安南已以僞敕立其國人提婆荅爲王義等不俟奏報輒以印幣授提婆荅封之得所賂黃金百餘兩又往滿刺加國盡貨其私物以歸義至海洋病死瑾具其事并上僞敕於朝朝廷不知也至十七年九月古來遣使朝貢言安南破臣國時故王弟槃羅茶悅逃居佛靈山比天使齋封誥至已爲賊人執去臣與兄齋亞麻弗菴潛竄山谷後賊人畏懼天威遣人訪覓臣兄還以故地然自邦都郎至占臘止五處爾臣兄權國未幾遽爾隕歿臣當嗣立不敢自專仰望天恩賜之冊印臣國所有土地本二十七處四府一州二十

二縣東至海南至占臘西至黎人山北至阿本喇補凡三千五百餘里更乞特諭交人盡還本國章下廷議英國公張懋等請特遣近臣有威望者二人往使時安南貢使方歸卽賜敕詰責黎灝令速還地毋抗朝命禮官乃劾瑾擅封執下詔獄具得其情論死時古來所遣使臣在館召問之云古來實王弟其王乃病死非弑提婆苔不知何人乃命使臣暫歸廣東俟提婆苔使至審誠僞處之使臣候命經年而提婆苔使者不至乃令還國二十年敕古來撫諭提婆苔使納原降國王印宥其受僞封之罪仍爲頭目提婆苔不受命乃遣給事中李孟暘行人葉應冊封古來爲國王孟暘等行言占城險遠安南構兵未已而提婆苔又竊據其地稍或不慎反損國

威宜令其來使傳諭古來詣廣東受封并敕安南悔禍從之古來乃自老撾挈家赴崖州孟暘竣封事而返古來又欲躬詣闕廷奏安南之罪二十三年正月總督宋旻以聞廷議遣大臣一人往勞檄安南存亾繼絕迎古來返占城帝報可乃命南京右都御史屠瀟往至廣東卽傳檄安南宣示禍福而募健卒二千人駕海舟二十艘護古來還國安南以瀟大臣奉特遣不敢與抗古來乃得入明年弘治改元遣使入貢二年遣弟卜古良赴廣東言安南仍肆侵陵乞如永樂時遣將督兵守護總督秦紘等以聞兵部言安南占城皆祖訓所載不征之國永樂間命將出師乃正黎賊弑逆之罪非以鄰境交惡之故今黎灝修貢惟謹古來膚受之愬容有過情不可

信其單詞勞師不征之國宜令守臣回咨言近交人殺害王子古蘇麻王卽率衆敗之仇恥已雪王宜自強修政撫卹國人保固疆圉仍與安南敦睦修好其餘嫌細故悉宜捐除倘不能自強專藉朝廷發兵渡海代王守國古無是理帝如其言三年七月遣使謝恩其國自殘破後民物蕭條貢使漸稀十二年遣使奏本國新州港之地仍爲安南侵奪患方未息臣年已老請及臣未死命長子沙古卜洛襲封庶他日可保國土廷議安南爲占城患已非一日朝廷嘗因占城之愬累降璽書曲垂誨諭安南前後奏報皆言祇承朝命土地人民悉已退還然安南辨釋之語方至而占城控訴之詞又聞恐真有不獲已之情宜仍令守臣切諭安南毋貪人土地自貽

禍殃否則議遣偏師往問其罪若占城王長子無父在襲封之理請令先立爲世子攝國事俟他日當襲位時如例請封帝報允尋遣王孫沙不登古魯來貢十八年古來卒其子沙古卜洛遣使來貢而不告父喪但乞命大臣往其國仍以新州港諸地封之別有占奪方輿之奏微及父卒事給事中任良弼等言占城前因國土削弱假貢乞封仰仗天威讐伏鄰國其實國王之立不立不係朝廷之封不封也今稱古來已歿虛實難知萬一我使至彼古來尚存將遂封其子乎抑義不可而已乎迫脅之間事極難處如往時科臣林霄之使滿刺加不肯北而屈膝幽餓而死迄不能問其罪君命國威不可不愼大都海外諸蕃無事則廢朝貢而自立有事則假朝

貢而請封今者貢使之來豈急於求封不過欲復安南之侵地還粵東之逃人耳夫安南侵地璽書屢諭歸還而占據如故今若再諭彼將玩視之而天威褻矣倘我使往封占城羈留不遣求爲處分朝廷將何以應之又或拘我使者令索逃人是以天朝之貴臣質於海外之蠻邦也宜如往年古來就封廣東事令其領敕歸國於計爲便禮部亦以古來存亾未明請令廣東守臣移文占城勘報從之旣而封事久不行至五年七月沙古卜洛遣其叔父沙係把麻入貢因請封命給事中李貫行人劉廷瑞往貫抵廣東憚行請如往年古來故事令其使臣領封廷議遣官已二年今若中止非興滅繼絕義倘其使不願領封或領歸而受非其人重起事端益傷國

體宜令貫等亟往貫終憚行以乏通事火長爲詞廷議令廣東守臣采訪其人如終不得則如舊例行貫復設詞言臣奉命已五載孰不謂憚風波之險殊不知占城自古來被逐之後竄居赤坎邦都郎國非舊疆勢不可往況古來乃前王齋亞麻弗菴之頭目實殺王而奪其位王有三子其一尚存則義又有所不可律以春秋之法雖不興問罪之師亦必絕朝貢之使柰何又爲采訪之議苟延歲月而無益於事哉會廣東巡按丁楷亦附會具奏廷臣乃議從之以十年七月令其使臣齋敕往自是遂爲故事而其國貢使亦不常至嘉靖二十二年遣王叔沙不登古魯來貢訴數爲安南侵擾道阻難歸乞遣官護送還國報可其國無霜雪四時皆似夏草木常

青民以漁為業無二麥力穡者少故收穫薄國人皆食檳榔
終日不離口不解朔望但以月生為初月晦為盡不置閏分
晝夜為十更非日中不起非夜分不臥見月則飲酒歌舞為
樂無紙筆用羊皮槌薄熏黑削細竹蘸白灰為字狀若蚯蚓
有城郭甲兵人性很而狡貿易多不平戶皆北向民居悉覆
茅檐高不得過三尺部領分差等門高卑亦有限飲食穢污
魚非腐爛不食釀不生蛆不為美人體黑男蓬頭女椎結俱
跣足王瑣里人崇釋教歲時采生人膽入酒中與家人同飲
且以浴身曰通身是膽其國人采以獻王又以洗象日每伺
人於道出不意急殺之取膽以去若其人驚覺則膽已先裂
不足用矣置眾膽於器華人膽輒居上故尤貴之五六月間

商人出必戒備王在位三十年則避位入深山以兄弟子姪
代而已持齋受戒告於天曰我為君無道願狼虎食我或病
死居一年無恙則復位如初國中呼為昔嚟馬哈刺乃至尊
至聖之稱也國不甚富惟犀象最多烏木降香樵以為薪棋
楠香獨產其地一山酋長遣人守之民不得采犯者至斷手
有鱗魚潭獄疑不決者令兩造騎牛過其旁曲者魚輒躍而
食之直者即數往返不食也有尸頭蠻者一名屍致魚本嬾
人惟無瞳神為異夜中與人同寢忽飛頭食人穢物來即復
活若人知而封其頸或移之他所其婦即死國設厲禁有而
不告者罪及一家
賓童龍國與占城接壤或言如來入舍衛國乞食即其地也

氣候草木人物風土大類占城惟遭喪能持服葬以僻地設齋禮佛婚姻偶合酋出入乘象或馬從者百餘人前後讚唱民編茅覆屋貨用金銀花布有崑崙山節然大海中與占城及東西竺鼎峙相望其山方廣而高其海即曰崑崙洋諸往西洋者必待順風七晝夜始得過故舟人為之諺曰上怕七州下怕崑崙針迷舵失人船莫存此山無異產人皆穴居巢處食果實魚蝦無室廬井竈

真臘在占城南順風三晝夜可至隋唐及宋皆朝貢宋慶元中滅占城而并其地因改國名曰占臘元時仍稱真臘洪武三年八月遣使臣郭徵等齎詔撫諭其國四年十一月其國巴山王忽兒那使使進表貢方物賀明年正旦詔賜大統曆

及綵幣使者亦給賜有差六年進貢十二年其王參荅甘武者持達志使使來貢宴賜如前十三年復貢十六年遣使齎勘合文冊賜其王凡中國使至而勘合不符者即屬矯偽許繫縛以聞復遣使賜織金文綺三十二磁器萬九千其王即使使來貢十九年復遣行人劉敏唐敬偕中官齎磁器往賜明年敬等還其王使使貢象五十九匹香六萬斤尋遣使賜其王鍍金銀印王及妃皆有賜其王參烈寶毘邪甘苦者使使貢象及方物明年復貢象二十八匹象奴三十四人番奴四十五人謝賜印之恩二十二年三貢明年復貢永樂元年遣行人蔣賓興王樞以即位詔諭其國明年其王參烈婆毘牙使使來朝貢方物初中官使真臘有部卒三人潛遁索之

不得王以其國三人代之至是引見帝曰華人自逃於彼何預而責償且語言不通風土不習吾焉用之命賜衣服及道里費遣還三年使使來貢告故王之喪命鴻臚序班王孜致祭給事中畢進中官王琮齋詔封其嗣子參烈昭平牙爲王進等還嗣王使使偕來謝恩六年十二年再入貢使者以其國數被占城侵擾久留不去帝遣中官送之還并敕占城王罷兵修好十五年十七年竝入貢宣德景泰中亦使使入貢自後不常至其國城隍周七十餘里幅員廣數千里國中有金塔金橋殿宇三十餘所王歲時一會羅列玉猿孔雀白象犀牛於前名曰百塔洲盛食以金盤金椀故有富貴真臘之諺民俗富饒天時常熱不識霜雪禾一歲數稔男女椎結穿

短衫圍稍布刑有剽刳刺配盜則去手足番人殺唐人罪死唐人殺番人則罰金無金則鬻身贖罪唐人者諸番呼華人之稱也凡海外諸國盡然婚嫁兩家俱八日不出門晝夜燃燈人死置於野任鳥鳶食俄頃食盡者謂爲福報居喪但髡其髮女子則額上翦髮如錢大曰用此報親文字以麋鹿雜皮染黑用粉爲小條畫於上永不脫落以十月爲歲首閩悉用九月夜分四更亦有曉天文者能算日月薄蝕其地謂儒爲班詰僧爲苧姑道爲八思班詰不知讀何書由此入仕者爲華貫先時項掛一白線以自別旣貴曳白如故俗尚釋教僧皆食魚肉或以供佛惟不飲酒其國自稱甘字智後訛爲甘破蔗萬曆後又改爲東埔寨

暹羅在占城西南順風十晝夜可至卽隋唐赤土國後分爲
羅斛暹二國暹土瘠不宜稼羅斛地平行種多獲暹仰給焉
元時暹常入貢其後羅斛強併有暹地遂稱暹羅斛國洪武
三年命使臣呂宗俊等齎詔諭其國四年其王參烈昭毘牙
遣使奉表與宗俊等偕來貢馴象六足龜及方物詔賜其王
錦綺及使者幣帛有差已復遣使賀明年正旦詔賜大統曆
及綵幣五年貢黑熊白猿及方物明年復來貢其王之姊參
烈思寧別遣使進金葉表貢方物於中宮却之已而其姊復
遣使來貢帝仍却之而宴賚其使時其王懦而不武國人推
其伯父參烈寶毘牙唵哩哆囉祿王國事遣使來告貢方物
宴賚如制已而新王遣使來貢謝恩其使者亦有獻帝不納

已遣使賀 六年正旦貢方物且獻本國地圖七年使臣沙里
拔來貢言 八年舟次烏猪洋遭風壞舟飄至海南賴官司救
護尚存飄 兒羅綿降香蘇木諸物進獻廣東省臣以聞帝
怪其無表 言舟覆而方物乃有存者疑其爲番商命却之
論中書及 禮部臣曰古諸侯於天子比年一小聘三年一大
聘九州之 外則每世一朝所貢方物表誠敬而已惟高麗頗
知禮樂故 人三年一貢他遠國如占城安南西洋瑣里瓜哇
淳泥三佛 流進羅斛真臘諸國入貢旣頻勞費太甚今不必
復爾其移 世諸國俛知之然而來者不止其世子蘇門邦王
昭祿羣膺 亦遣使上箋於皇太子貢方物命引其使朝東宮
宴賚遣之 八年已再入貢而其舊明臺王世子昭亨羅局亦

遣使奉表朝貢宴賚如王使十年昭祿羣鷹承其父命來朝帝喜命禮部員外郎王恆等齋詔及印賜之文曰暹羅國王之印并賜世子衣幣及道里費自是其國遵朝命始稱暹羅而比年一貢或一年兩貢至正統後乃或數年一貢云十六年賜勘合文冊及文綺磁器與眞臘等二十年貢胡椒一萬斤蘇木一萬斤帝遣官厚報之時溫州民有市其沈香諸物者所司坐以通番當棄市帝曰溫州乃暹羅必經之地因其往來而市之非通番也乃獲宥二十一年貢象三十番奴六十二十二年貢世子昭祿羣鷹遣使來貢二十三年貢蘇木胡椒降香十七萬斤二十八年昭祿羣鷹遣使朝貢且告其父之喪命中官趙達等往祭救世子嗣王位賜賚有加諭之曰

朕自卽位以來命使出疆周於四維足履其境者三十六聲同於耳者三十一風殊俗異大國十有八小國百四十九較之於今暹羅最近邇者使至知爾先王已逝王紹先王之緒有道於邦家臣民歡懌茲特遣人錫命王其罔失法度罔淫於樂以光前烈欽哉成祖卽位詔諭其國永樂元年二月賜其王昭祿羣鷹哆囉諦刺駝紐鍍金銀印其王卽遣使謝恩六月以上高皇帝尊諡遣官頒詔有賜八月復命給事中王哲行人成務賜其王錦綺九月命中官李興等齋敕勞賜其王其文武諸臣竝有賜二年九月有番船飄至福建海岸詰之乃暹羅與琉球通好者所司籍其貨以聞帝曰二國修好乃甚美事不幸遭風正宜憐恤豈可因以爲利所司其治舟

給粟俟風便遣赴琉球是月其王以帝降璽書勞賜遣使來謝貢方物賜賚有加并賜列女傳百冊其使者請頒量衡爲國永式從之先是占城貢使返風飄其舟至彭亨暹羅索取其使羈留不遣蘇門答刺及滿刺加又訴暹羅恃強發兵奪天朝所賜印誥帝乃降敕責之曰占城蘇門答刺滿刺加與爾俱受朝命安得逞威拘其貢使奪其誥印天有顯道福善禍淫安南黎賊可爲鑒戒其卽返占城使者還蘇門答刺滿刺加印誥曰今奉法循理保境睦鄰庶永享太平之福時暹羅所遣貢使失風飄至安南盡爲黎賊所殺止餘字黑一人後官軍征入南獲之以歸帝憫之六年八月命中官張原送還國賜王帛令厚恤被殺者之家九月中官鄭和使其國

其王遣使貢方物謝前罪七年正月使來祭仁孝皇后命中官告之凡筵時奸民何八觀等逃入暹羅帝命使者還告其主母納逋逃其王卽奉命遣使貢馬及方物并送八觀等還命張原齋敕幣獎之十年命中官洪保等往賜幣十四年王子二賴波羅摩刺剌的賴遣使告父之喪命中官郭文往祭別遣官齋詔封其子爲王賜以素錦素羅隨遣使謝恩十七年以暹羅侵滿刺加使使責令輯睦旣爲其使入貢命中官楊敏等護歸王復遣使謝侵滿刺加之罪宣德八年其王悉里麻哈賴遣使朝貢初其國陪臣柰三鐸等貢舟次占城新州港盡爲其國人所掠至正統元年柰三鐸潛附小舟來京而其王所遣貢使亦至皆訴占城劫掠狀帝命名占城使者

與相質使者無以對乃敕占城王令盡還所掠人物已而占城移咨禮部言本國前歲遣使往須文達那亦爲暹羅賊人掠去必暹羅先還所掠本國自不敢不還三年暹羅貢使又至因賜敕曉以此意令亟還占城人物十一年其王思利波羅麻那惹智刺復遣使入貢景泰四年命給事中劉洙行人劉泰祭其故王波羅摩刺剌的賴因封其嗣子把羅蘭米孫刺爲王天順元年賜其貢使銀花金帶六年其王孛刺藍羅者直波智遣使朝貢成化九年貢使言天順元年所頒勘合爲蟲所蝕乞改給從之十七年貢使還至中途竊買子女且多載私鹽命遣官戒諭諸番先是汀州人謝文彬以販鹽下海飄入其國仕至坤岳猶天朝學士也後充使來朝因貿易

禁物事覺下吏十八年遣使朝貢且告父喪命給事中林霄行人姚隆往封其子國隆勃刺略坤息刺尤地爲王弘治十年入貢時四夷館無暹羅譯字官閣臣徐溥等請移牒廣東訪取能通彼國言語文字者赴京備用從之正德四年暹羅船有飄至廣東者市舶中官熊宣與守臣議稅其物供軍需事聞詔斥宣妄攬事柄撤還南京十年進金葉表朝貢館中無識其字者閣臣梁儲等請選留其使一二人入館肄習報可嘉靖元年暹羅占城貨船至廣東市舶中官牛榮縱家人私市論死如律三十二年遣使貢白象及方物象死於途其使者以珠寶飾其牙盛以金盤并尾來獻帝嘉其意厚遣之隆慶中其鄰國東蠻牛求婚不得慙怒大發兵攻破其國王

自經擄其世子及天朝所賜印以歸次子嗣位奉表請印予之自是為東蠻牛所制嗣王勵志復讐萬曆間敵兵復至王整兵奮擊大破之殺其子餘眾宵遁暹羅由是雄海上移兵攻破真臘降其王從此歲歲用兵遂霸諸國六年遣使入貢二十年日本破朝鮮暹羅請潛師直擣日本牽其後中樞石星議從之兩廣督臣蕭彥持不可乃已其後奉貢不替迄崇禎十六年三月猶入貢其國周千里風俗勁悍習於水戰大將用聖鐵裹身刀矢不能入聖鐵者人腦骨也王瑣里人官分十等自王至庶民有事皆決於其婦其婦人志量實出男子上婦私華人則夫置酒同飲恬不為怪曰我婦美為華人所悅也崇信釋教男女多為僧尼亦居菴寺持齋受戒衣服

頗類中國富貴者尤敬佛百金之產即以其半施之氣候不正或寒或熱地卑濕人皆樓居男女椎結以白布裹首富貴者死用水銀灌其口而葬之貧者則移置海濱即有羣鴉飛啄俄頃而盡家人拾其骨號泣而棄之於海謂之鳥葬亦延僧設齋禮佛交易用海貳是年不用貳則國必大疫其貢物有象象牙犀角孔雀尾翠羽龜筒六足龜寶石珊瑚片腦米腦糠腦腦油腦柴薔薇水碗石丁皮阿魏紫梗藤竭藤黃硫黃沒藥烏爹泥安息香羅斛香速香檀香黃熟香降真香乳香樹香木香丁香烏香胡椒蘇木肉荳蔻白荳蔻萆茛烏木大楓子及撒哈刺西洋諸布其國有三寶廟祀中官鄭和瓜哇在占城西南元世祖時黥使臣孟琪面世祖大舉兵伐

之破其國而還洪武二年正月太祖遣使以即位詔諭其國其使臣先奉貢於元還至福建而元亡因入居京師是年二月太祖復遣使送之還且賜以大統曆三年六月以平定沙漠頒詔曰自古為天下主者視天地所覆載日月所照臨若遠若近生人之類莫不欲其安土而樂生然必中國安而後四方萬國順附邇元君妥懽帖木兒荒淫昏弱志不在民天下英雄分裂疆宇朕憫生民之塗炭興舉義兵攘除亂略天下軍民共尊朕居帝位國號大明建元洪武前年克取元都四方以次底定占城安南高麗諸國俱來朝貢今年遣將北征始知元君已歿獲其孫買的里八剌封為崇禮侯朕倣前代帝王治理天下惟欲中外人民各安其所又慮諸蕃僻在

遠方未悉朕意故遣使者往諭咸使聞知九月其王昔里八達刺蒲遣使奉金葉表來朝貢方物宴賚如禮五年又遣使隨朝使常克敬來貢上元所授宣敕三道八年又貢十年王八達那巴那務遣使朝貢其國又有東西二王東蕃王勿院勞網結西蕃王勿勞波務各遣使朝貢天子以其禮意不誠詔留其使已而釋還之十二年王八達那巴那務遣使朝貢明年又貢時遣使賜三佛齊王印綬瓜哇誘而殺之天子怒留其使月餘將加罪已遣還賜勅責之十四年遣使貢黑奴三百人及他方物明年又貢黑奴男女百人大珠八顆胡椒七萬五千斤二十六年再貢明年又貢成祖即位詔諭其國永樂元年又遣副使聞良輔行人甯善賜其王絨錦織金文

綺紗羅使者既行其西王都馬板遣使入賀復命中官馬彬等賜以鍍金銀印西王遣使謝賜印貢方物而東王字令達哈亦遣使朝貢請印命遣官賜之自後二王並貢三年遣中官鄭和使其國明年西王與東王構兵東王戰敗國被滅適朝使經東王地部卒入市西王國人殺之凡百七十人西王懼遣使謝罪帝賜勅切責之命輸黃金六萬兩以贖六年再遣鄭和使其國西王獻黃金萬兩禮官以輸數不足請下其使於獄帝曰朕於遠人欲其畏罪而已寧利其金耶悉捐之自後復比年入貢或間歲一貢或一歲數貢中官吳賓鄭和復先後使其國時舊港地有爲瓜哇侵據者滿刺加國王矯朝命索之帝乃賜勅曰前中官吳慶還言王恭待勅使有加

無替比聞滿刺加國索舊港之地王甚疑懼朕推誠待人若果許之必有勅諭王何疑焉小人浮詞慎勿輕聽十三年其王改名揚惟西沙遣使謝恩貢方物時朝使所攜卒有遭風飄至班卒兒國者瓜哇人珍班聞之用金贖還歸之王所十六年王遣使朝貢因送還諸卒帝嘉之賜勅獎王并優賜珍班自是朝貢使臣大率每歲一至正統元年使臣馬用良言先任八諦來朝蒙恩賜銀帶今爲亞烈秩四品乞賜金帶從之閏六月遣古里蘇門荅刺錫蘭山柯枝天方加異勒阿丹忽魯漢斯祖法兒甘巴里真臘使臣偕瓜哇使臣郭信等同往賜瓜哇勅曰王自我先朝修職勿怠朕今嗣服復遣使來朝誠意具悉宣德時有古里等十一國來貢今因王使者歸

令諸使同往王其加意撫卹分遣還國副朕懷遠之忱五年八月使臣回遭風溺死五十六人存者八十三人仍返廣東命所司廩給俟便舟附歸八年廣東參政張琰言瓜哇朝貢頻數供億煩費敝中國以事遠人非計帝納之其使還賜勅曰海外諸邦並三年一貢王亦宜體恤軍民一遵此制十一年復三貢後乃漸稀景泰三年王巴刺武遣使朝貢天順四年王都馬班遣使入貢使者還至安慶酗酒與長河西入貢番僧鬪僧死者六人禮官請治伴送行人罪使者勅國王自治從之成化元年入貢弘治十二年貢使遭風舟壞止通事一舟達廣東禮官請勅所司量予賜賚遣還其貢物仍進京師制可自是貢使鮮有至者其國近占城二十晝夜可至元

師西征以至元二十九年十二月發泉州明年正月卽抵其國相去止月餘宣德七年入貢表書一千三百七十六年蓋漢宣帝元康元年乃其建國之始也地廣人稠性兇悍男子無少長貴賤皆佩刀稍忤輒相賊故其甲兵爲諸蕃之最字類瑣里無紙筆刻於茭葦葉氣候常似夏稻歲二稔無几榻七箸人有三種華人流寓者服食鮮華他國賈人居久者亦尚雅潔其本國人最汙穢好啖蛇蟻虫蛆與犬同寢食狀黝黑猿頭赤脚崇信鬼道殺人者避之三日卽免罪父母死昇至野縱犬食之不盡則大戚燔其餘妻妾多燔以殉其國一名莆家龍又曰下港曰順塔萬曆時紅毛番築土庫於大澗東佛郎機築於大澗西歲歲互市中國商旅亦往來不絕其

國有新村最號饒富中華及諸番商船輻輳其地寶貨填溢其村主即廣東人永樂九年自遣使表貢方物

闍婆古曰闍婆達宋元嘉時始朝中國唐曰訶陵又曰社婆其王居闍婆城宋曰闍婆皆入貢洪武十一年其王摩那駝喃遣使奉表貢方物其後不復至或曰瓜哇即闍婆然元史瓜哇傳不言且曰其風俗物產無所考而太祖時兩國並時入貢其王之名不同或本為二國其後為瓜哇所滅然不可考

蘇吉丹瓜哇屬國後訛為思吉港國在山中止數聚落酋居吉力石其水滙舟不可泊商船但往饒洞其地平衍國人皆就此貿易其與國有思魯瓦及猪蠻猪蠻多盜華人鮮至

碟里近瓜哇永樂三年遣使附其使臣來貢其地尚釋教俗淳少訟物產甚薄

日羅夏治近瓜哇永樂三年遣使附其使臣入貢國小知種藝無盜賊亦尚釋教所產止蘇木胡椒

三佛齊古名干陀利劉宋孝武帝時嘗遣使奉貢梁武帝時數至宋名三佛齊修貢不絕洪武三年太祖遣行人趙述詔諭其國明年其王馬哈刺札八刺卜遣使奉金葉表隨入朝貢黑熊火雞孔雀五色鸚鵡諸香苾布兜羅被諸物詔賜大統曆及錦綺有差戶部言其貨舶至泉州宜徵稅命勿徵六年王怛麻沙那阿者遣使朝貢又一表賀明年正旦時其國有三王七年王麻那哈寶林邦遣使來貢八年正月復貢九

月王僧伽烈字蘭遣使隨招諭拂菻國朝使入貢九年怛麻沙那阿者卒子麻那者巫里嗣明年遣使貢犀牛黑熊火雞白猴紅綠鸚鵡龜筒及丁香米腦諸物使使者言嗣子不敢擅立請命於朝天子嘉其義命使臣齋印勅封爲三佛齊國王是時瓜哇強已威服三佛齊而役屬之聞天朝封爲國王與巴埒則大怒遣人誘朝使邀殺之天子亦不能問罪自是其國益衰貢使遂絕三十年八月禮官以諸蕃久缺貢奏聞帝曰洪武初諸蕃貢使不絕邇者安南占城真臘暹羅瓜哇大琉球三佛齊淳泥彭亨百花蘇門答刺西洋等三十國以胡惟庸作亂三佛齊乃生間諜給我使臣至彼瓜哇王聞知遣人戒飭禮送還二由是商旅阻遏諸國之意不通惟安南

占城真臘暹羅大琉球朝貢如故大琉球且遣子弟入學凡諸番國使臣來者皆以禮待之我視諸國不薄未知諸國心若何今欲遣使瓜哇恐三佛齊中途沮之聞三佛齊本瓜哇屬國可述朕意移咨暹羅俾轉達瓜哇於是部臣移牒曰自有天地以來卽有君臣上下之分中國四裔之防我朝混一之初海外諸蕃莫不來享豈意胡惟庸謀亂三佛齊遂生異心給我信使肆行巧詐我聖天子一以仁義待諸蕃何諸蕃敢背大恩失君臣之禮倘天子震怒遣一偏將將十萬之師恭行天罰易如覆手爾諸蕃何不思之甚我聖天子嘗曰安南占城真臘暹羅大琉球皆修臣職惟三佛齊梗我聲教彼以叢爾之國敢倔強不服自取滅亡爾暹羅恪守臣節天朝

眷禮有加可轉達瓜哇令以大義告諭三佛齊誠能省愆從善則禮待如初然是時瓜哇已破三佛齊據其國改其名曰舊港三佛齊遂亾國中大亂瓜哇亦不能盡有其地華人流寓者往往起而據之有梁道明者廣州南海縣人久居其國聞粵軍民泛海從之者數千家遂推道明爲首雄視一方會指揮孫鉉使海外遇其子挾與俱來永樂三年成祖以行人譚勝受與道明同邑命偕千戶楊信等齎勅招之道明及其黨鄭伯可隨入朝貢方物受賜而還四年舊港頭目陳祖義遣其子士良道明遣其從子觀政並來朝祖義亦廣東人雖朝貢而爲盜海上貢使往來者苦之五年鄭和自西洋還遣人招諭之祖義詐降而潛謀邀劫有施進卿者告於和祖義

來襲被擒獻於朝伏誅時進卿適遣其壻丘彥誠朝貢命設舊港宣慰司以進卿爲使錫誥印及冠帶自是屢入貢然進卿雖受朝命猶服屬瓜哇其地狹小非故時三佛齊比也二十二年進卿子濟孫告父訃乞嗣職許之洪熙元年遣使人貢訴舊印爲火燬帝命重給其後朝貢漸稀嘉靖末廣東大盜張璉作亂官軍已報克獲萬曆五年商人詣舊港者見璉列肆爲蕃舶長漳泉人多附之猶中國市舶官云其地爲諸蕃要會在瓜哇之西順風八晝夜可至轄十五洲土沃宜稼語云一年種穀三年生金言收穫盛而買金多也俗富好淫習於水戰鄰國畏之地多水惟部領陸居庶民皆水居編筏築室繫之於椿水漲則筏浮無沈溺患欲徙則拔椿去之不

費財力下稱其上曰詹卑猶國君也後大酋所居即號詹卑
國而故都則改為舊港初本富饒自瓜哇破滅後漸致蕭索
船亦鮮至其他風俗物產具詳宋史

百九十八終

明史藁

列傳第一百九十九

光祿大夫 經筵講官明史總裁戶部尚書加七級臣王鴻緒奉
敕編撰

外國六

淳泥

滿刺加

蘇門答刺須文達那

蘇祿

西洋瑣里

瑣里

覽邦

淡巴

百花

彭亨

一作滙亨
又作彭坑

那孤兒

黎伐

南渤利

阿魯

柔佛

丁機宜

巴刺西

佛郎機

和蘭

淳泥於古無所考宋太宗時始通中國太祖洪武三年八月命御史張敬之福建行省都事沈秩往使自泉州航海閱半年抵闍婆又踰月至其國王馬合謨沙傲慢不為禮秩責之始下座拜受詔時其國為蘇祿所侵頗衰耗王辭以貧請三年後入貢秩曉以大義王既許諾其國素屬闍婆闍婆人間之王意中沮秩折之曰闍婆久稱臣奉貢爾畏闍婆反不畏天朝耶乃遣使奉表箋貢鶴頂生玳瑁孔雀梅花大片龍腦米龍腦西洋布降真諸香八月從敬之等入朝表用金箋用銀字近回鵲皆鏤之以進帝喜宴賚甚厚八年命其國山川附祀福建山川之次永樂三年冬其王麻那惹加那乃使使入貢遣官封為國王賜印誥勅符勘合錦綺綵幣王大悅率

妃及弟妹子女陪臣泛海來朝福建守臣以聞遣中官往宴勞所過州縣皆宴六年八月入都朝見帝獎勞之王跪致詞曰陛下膺天寶命統一萬方臣遠在海島荷蒙天恩賜以封爵自是國中雨暘時順歲屢豐登民無災厲山川之間珍奇畢露草木鳥獸亦悉蕃育國中耆老咸謂此聖天子覆冒所致臣願睹天日之表少輸悃誠故不憚險遠躬率家屬陪臣詣闕獻謝帝慰勞再三命王妃所進中宮箋及方物陳之文華殿王詣殿進獻畢自王及妃以下悉賜冠帶襲衣帝乃饗王於奉天門妃以下饗於他所禮訖送歸會同館禮官請王見親王儀帝令準公侯禮尋賜王儀仗交椅銀器傘扇銷金鞍馬金織文綺紗羅綾絹衣十襲餘賜賚有差十月王卒

於館帝哀悼輟朝三日遣官致祭賻以繒帛東宮親王皆遣祭有司具棺槨明器葬之安德門外石子岡樹碑神道又建祠墓側有司春秋祀以少牢諡曰恭順賜勅慰其子遐旺命襲封國王遐旺與其叔父上言臣國歲供瓜哇片腦四十斤乞勅瓜哇罷供歲進天朝臣今歸國乞命官護送就留鎮一年慰國人之望并乞定朝貢期及僚從人數帝悉從之命三年一貢僚從惟王所遣遂勅瓜哇國免其歲供王辭歸賜玉帶一金百兩銀三千兩及錢鈔錦綺紗羅衾褥帳幔器物餘皆有賜以中官張謙行人周航護行初故王言臣蒙恩賜爵臣境土悉屬職方乞封國之後山爲一方鎮新王復以爲言乃封爲長寧鎮國之山御製碑文令謙等勒碑其上其文曰

上天佑啟我國家萬世無疆之基肆命朕太祖高皇帝全撫天下休養生息以治以教仁聲義問薄極照臨四方萬國奔走臣服充湊於庭神化感動之機其妙如此朕嗣守鴻圖率由典式嚴恭祗畏協和所統無間內外均視一體遐邇綏寧亦克承予意乃者淳泥國王誠敬之至知所尊崇慕尚聲教益謹益虔率其眷屬陪臣不遠數萬里浮海來朝達其志通其欲稽顙陳辭曰遠方臣妾丕冒天子之恩以養以息旣庶且安思見日月之光故不憚險遠輒敢造庭又曰覆我者天載我者地使我有土地人民之奉田疇邑井之聚宮室之居妻妾之樂和味宜服利用備器以資其生強罔敢侵衆罔敢暴實惟天子之賜是天子功德所加與天地竝然天仰則見

之矣地踳則履之矣惟天子遠而難見誠有所不通是以遠方臣妾不敢自外踰歷山海躬詣闕廷以伸其悃朕曰惟天惟皇考付予以天下子養庶民天與皇考視民同仁予其承天與皇考之德惟恐弗堪弗若汝言乃又拜手稽首曰自天子建元之載臣國時和歲豐山川之藏珍寶者皆流溢焉草木之無葩蘓者皆華而實焉異禽和鳴而走獸踰舞焉國之黃叟曰中國聖人德化漸暨斯多嘉應臣土雖遠京師然實天子之氓故奮然而來覲也朕觀其言文貌恭動不踰則悅喜禮教脫略故習非超然卓異者不能若此也稽之載籍自古邇遠之國奉若天道仰望聲教身致帝庭蓋有之矣至於舉妻子兄弟親戚陪臣頓首稱臣妾於階陛之下者惟淳泥

國王一人而已西南諸蕃國長未有如王之賢者也王之至誠貫於金石達於神明而令名傳於悠久可謂有光顯矣茲特錫封王國中之山爲長寧鎮國之山賜文刻石以著王休於昭萬年其永無斁系之詩曰炎海之墟淳泥所處煦仁漸義有順無迕悽悽賢王惟化之慕導以象胥適來奔赴同其婦子兄弟陪臣稽顙闕下有言以陳謂君猶天遺其休樂一視同仁匪偏厚薄顧茲鮮德弗稱所云浪舶風檣實勞懇勤稽古遠臣順來怒赳以躬或難矧曰家室王心亶誠金石其堅西南蕃長疇與王賢蠹蠹高山以鎮王國鑱文於石懋昭王德王德克昭王國攸寧於萬斯年仰我大明八年九月遣使從謙等入貢謝恩明年復命謙賜其王錦綺紗羅綵絹凡

百二十匹其下皆有賜十年九月遐旺偕其母來朝命禮官宴之會同館光祿寺旦暮給酒饌明日帝饗之奉天門王母亦有宴越二日再宴賜王冠帶襲衣王母王叔父以下分賜有差明年二月辭歸賜金百銀五百鈔三千錠錢千五百緡錦四綺帛紗羅八十金織文繡文綺衣各一衾褥幃幔器物咸具自十三年至洪熙元年四人貢後貢使漸稀嘉靖九年給事中王希文言暹羅占城琉球瓜哇淳泥五國來貢竝道東莞後因私攜賈客多絕其貢正德間佛郎機關人流毒槩行屏絕曾未幾年遽爾議復損威已甚章下都察院請悉遵舊制毋許混冒萬曆中其王卒無嗣族人爭立國中殺戮幾盡乃立其女爲王漳州人張姓者初爲其國邪督譯音官

也因亂出奔女主立迎還之其女出入王宮得心疾妄言父有反謀女主懼遣人按問其家那督自殺國人爲訟冤女主悔絞殺其女授其子官後雖不復朝貢而商人往來不絕國統十四洲在舊港之西自占城四十日可至初屬瓜哇後屬暹羅改名大泥華人多流寓其地嘉靖末閩粵海寇遺孽逋逃至此積二千餘人萬曆時紅毛番強商其境築土庫以居其入彭湖互市者所攜乃大泥國文也諸風俗物產具詳宋史

滿刺加在占城南順風八日至龍牙門又西行二日卽至或云卽古頓遜唐哥羅富沙永樂元年十月遣中官尹慶使其地賜以織金文綺銷金帳幔諸物其地無王亦不稱國服屬

暹羅歲輸金四十兩爲賦慶至宣示威德及招徠之意其酋
拜里迷蘇刺大喜遣使隨慶入朝貢方物三年九月至京師
帝嘉之封爲滿刺加國王賜詔印綵幣襲衣黃蓋復命慶往
其使者言王慕義願同中國列郡歲効職貢請封其山爲一
國之鎮帝從之製碑文勒山上末綴以詩曰西南鉅海中國
通輪天灌地億載同洗日浴月光景融雨崖露石草木濃金
花寶鈿生青紅有國於此民俗雍王好善義思朝宗願比內
郡依華風出入導從張蓋重儀文初襲禮虔恭大書貞石表
爾忠爾國西山永鎮封山居海伯翁扈從皇考陟降在彼穹
後天監視久益隆爾衆子孫萬福崇慶等再至其王益喜禮
待有加五年九月遣使入貢明年鄭和使其國旋入貢九年

其王率妻子陪臣五百四十餘人來朝抵近郊命中官海壽
禮部郎中黃裳等宴勞有司供張會同館入朝奉天殿帝親
宴之妃以下宴他所光祿日致牲牢上尊賜王金繡龍衣二
襲麒麟衣一襲金銀器帷幔衾褥悉具妃以下皆有賜將歸
賜王玉帶儀仗鞍馬賜妃冠服瀕行賜宴奉天門再賜玉帶
儀仗鞍馬黃金百白金五百鈔四十萬貫錢二千六百貫錦
綺紗羅三百匹帛千匹渾金文綺二金織通袖膝襪二妃及
子姪陪臣以下宴賜有差禮官餞於龍江驛復賜宴龍潭驛
十年夏其姪入謝及辭歸命中官甘泉偕往旋又入貢十二
年王子母幹撒于的兒沙來朝告其父訃卽命襲封賜金幣
嗣後或連歲或間歲入貢以爲常十七年王率妻子陪臣來

朝謝恩及辭歸訴暹羅見侵狀帝爲賜勅諭暹羅暹羅乃奉
詔二十二年西里麻哈刺以父沒嗣位率妻子陪臣來朝宣
德六年遣使者來言暹羅謀侵本國王欲入朝懼爲所阻欲
奏聞無能書者令臣三人附蘇門答刺貢舟入訴帝命附鄭
和舟歸國因令和齋勅諭暹羅責以輯睦鄰封毋違朝命初
三人至無貢物禮官言例不當賞帝曰遠人越數萬里來懇
不平豈可無賜遂賜襲衣綵幣如貢使例八年王率妻子陪
臣來朝抵南京天已寒命俟春和北上別遣人齋勅勞賜王
及妃洎入朝宴賚如禮及還有司爲治舟王復遣其弟貢駝
馬方物時英宗已嗣位而王猶在廣東賜勅獎王命守臣送
還國因遣古里真臘等十一國使臣附載借還正統十年其

使者請賜王息力八密息瓦兒丟八沙護國勅書及蟒服傘
蓋以鎮服國人又言王欲親詣闕下從人多乞賜一巨舟以
便遠涉帝悉從之景泰六年速魯檀無答佛哪沙貢馬及方
物請封爲王詔給事中王暉往已復入貢言所賜冠帶燬於
火命製皮弁服紅羅常服及犀帶紗帽予之天順三年王子
蘇丹芒速沙遣使人貢命給事中陳嘉猷等往封之越二年
禮官言嘉猷等浮海二日至烏猪洋遇颶風舟壞飄六日至
清瀾守禦所獲救勅書無失諸賜物悉清水乞重給令使臣
復往從之成化十年給事中陳峻冊封占城王遇安南兵據
占城不得入以所齋物至滿刺加諭其王入貢其使者至帝
喜賜勅嘉獎十七年九月貢使言成化五年貢使還飄抵安

南境多被殺餘黥爲奴幼者加宮刑今已據占城地又欲吞本國本國以皆爲王臣未敢與戰適安南貢使亦至滿刺加使臣請與廷辯兵部言事屬既往不足深較帝乃因安南使還勅責其王并諭滿刺加安南復侵陵卽整兵待戰尋遣給事中林榮行人黃乾亨冊封王子馬哈木沙爲王二人溺死贈官賜祭予恤其家餘勅有司海濱招魂祭亦恤其家復遣給事中張晟行人左輔往晟卒於廣東命守臣擇一官爲輔副以終封事正德三年使臣端亞智等入貢其通事亞劉本江西萬安人蕭明舉負罪逃入其國賂大通事王永序班張字謀往淳泥索寶而禮部吏侯永等亦受賂僞爲符印擾郵傳還至廣東明舉與端亞智輩爭言遂與同事彭萬春等

劫殺之盡取其財物事覺逮入京明舉凌遲萬春等斬王永減死罰米三百石與張字侯永竝戍邊尚書白銀以下皆議罰劉瑾因此罪江西人減其解額五十名仕者不得任京職其後佛郎機強舉兵侵奪其地王蘇端媽末出奔遣使告難時世宗已嗣位勅責佛郎機令還其故土而諭暹羅諸國王以救災恤鄰之義迄無應者滿刺加竟爲所滅時佛郎機亦遣使朝貢請封抵廣東守臣以其國素不列王會羈其使以聞詔予方物之直遣歸後改名麻六甲云滿刺加所貢物有瑪瑙珍珠玳瑁珊瑚樹鶴頂金母鶴頂瑣服白苾布西洋布撒哈刺犀角象牙黑熊黑猿白麂火雞鸚鵡片腦薔薇露蘇合油梔子花烏爹泥沈香速香金銀香阿魏之屬有山出泉

流爲溪土人淘沙取錫煎成塊曰斗錫田瘠少收民皆淘沙捕魚爲業氣候朝熱暮寒男女椎髻身體黝黑間有白者唐人種也俗淳厚市道頗平自爲佛郎機所破其風頓殊商舶希至多直詣蘇門答刺然必取道其國率被邀劫波路幾斷其自販於中國者則直達廣東香山澳接跡不絕云

蘇門答刺在滿刺加之西順風九晝夜可至或言卽漢條枝唐波斯大食二國地西洋要會也成祖初遣使以卽位詔諭其國永樂元年遣副使聞良輔行人甯善賜其酋織金文綺絨錦紗羅招徠之中官尹慶使瓜哇便道復使其國三年鄭和下西洋復有賜和未至其酋宰奴里阿必丁已遣使隨慶入朝獻方物詔封爲蘇門答刺國王賜印誥綵幣襲衣遂比

年入貢終成祖世不絕而鄭和凡三使其國先是其王之父與鄰國花面王戰中矢死王子年幼王妻號於衆曰孰能爲我報讐者我以爲夫與其國事有漁翁聞之率國人往擊馘其王而還王妻遂與之合稱爲老王旣而王子年長潛與部領謀殺老王而襲其位老王弟蘇幹刺逃之山中連年率衆侵擾十三年和復至其國蘇幹刺以頒賜不及已怒統數萬人邀擊和勒部卒及國人禦之大破賊衆追至南渤利國俘以歸其王遣使人謝宣德元年遣使人賀五年六月帝以外蕃貢使多不至遣和及王景弘遍歷諸國頒詔曰朕恭膺天命祇承太祖高皇帝太宗文皇帝仁宗昭皇帝大統君臨萬邦體祖宗之至仁普輯寧于庶類已大赦天下紀元宣德爾

諸蕃國遠處海外未有聞知茲遣太監鄭和王景弘等齎詔往諭其各敬天道撫人民共享太平之福凡歷二十餘國蘇門答刺與焉明年遣使入貢者再八年貢麒麟九年王弟哈利之漢來朝卒於京帝憫之贈鴻臚少卿賜諡有司治喪葬置守塚戶時景弘再使其國王遣弟哈尼者罕隨入朝明年至言王老不能治事請傳位於子乃封其子阿卜賽亦的爲國王自是貢使漸希成化二十二年其使者至廣東有司驗無印信勘合乃藏其表於庫却還其使別遣番人輸貢物京師稍有給賜自後貢使不至迨萬曆間國兩易姓其時爲王者人奴也奴之主爲國大臣握兵柄奴桀黠主使牧象象肥俾監魚稅日以大魚奉其主主大喜俾給事左右一日隨主

入朝見王尊嚴若神主鞠躬惟謹出謂主曰主何恭之甚主曰彼王也焉敢抗曰主第不欲王爾欲之主卽王矣主詫叱退之他日又進曰王左右侍衛少主擁重兵出鎮必入辭請以奴從主言有機事乞屏左右王必不疑奴乘間刺殺之奉主爲王猶反掌耳主從之奴果殺王大呼曰王不道吾殺之吾主卽王矣敢異議者齒此刃衆懼服不敢動其主遂篡位任奴爲心腹委以兵柄未幾奴復弑主而代之乃大爲防衛拓其宮建六門不得闌入雖勳貴不得帶刃上殿出乘象象駕亭而帷其外如是者百餘俾人莫測王所在其國俗頗淳出言柔媚惟王好殺歲殺十餘人取其血浴身謂可除疾貢物有寶石瑪瑙水晶石青回回青善馬犀牛龍涎香沈香速

香木香丁香降真香刀弓錫鎖服胡椒蘇木硫黃之屬貨舶至貿易稱平地本瘠無麥有禾禾一歲二稔四方商賈輻輳華人往者以地遠價高獲利倍他國其氣候朝如夏暮如秋夏有瘴氣婦人裸體惟腰圍一布其他風俗類滿刺加篡弒後易國名曰啞齊

須文達那古不知何國洪武十六年其國王殊旦麻勒兀達盼遣使俺八兒來朝貢馬二匹幼苾布十五匹隔著布入的力布各二匹花滿直地二番綿紬直地二兜羅綿二斤撒刺八二箇幼賴革著一箇撒哈刺一箇及薔薇水降香沈香速香諸物命賜王大統曆綺羅寶鈔使臣襲衣或言須文達那卽蘇門答刺洪武時所更然其貢物與王之名皆不同無可

考

蘇祿地近淳泥閣婆洪武初發兵侵淳泥大獲以閣婆援兵至乃還永樂十五年其國東王巴都葛叭哈刺西王麻哈刺叱葛刺麻丁峒王妻叭都葛巴刺卜竝率其家屬頭目凡三百四十餘人浮海朝貢進金鏤表文獻珍珠寶石玳瑁諸物禮之若滿刺加尋竝封爲國王賜印誥襲衣冠帶及鞍馬儀仗器物其從者亦賜冠帶有差居二十七日三王辭歸各賜玉帶一黃金百白金二千羅錦文綺二百帛三百鈔萬錠錢二千緡金繡蟒龍麒麟衣各一東王次德州卒於館帝遣官賜祭命有司營葬勒碑墓道謚曰恭定留妻妾僮從十人守墓俟畢三年喪遣歸乃使使齎勅諭其長子都馬舍曰爾父

知尊中國躬率家屬陪臣遠涉海道萬里來朝朕眷其誠悃已錫王封優加賜賚遣官護歸舟次德州遭疾隕沒朕聞之深爲哀悼已葬祭如禮爾以嫡長爲國人所屬宜卽繼承用緩藩服今特封爾爲蘇祿國東王爾尚益篤忠貞敬承天道以副眷懷以繼爾父之志欽哉十八年西王遣使入貢十九年東王母遣王叔叭都加蘇哩來朝所貢大珠一其重七兩有奇二十一年東王妃還國厚賜遣之明年入貢自後不復至萬曆時佛郎機屢攻之城據山險迄不能下其國於古無所考地瘠寡粟麥民率食魚蝦煮海爲鹽釀蔗爲酒織竹爲布氣候常熱有珠池夜望之光浮水面土人以珠與華入市易大者利數十倍商舶將返輒留數人爲質冀其再來其旁

近國名高藥出玳瑁

西洋瑣里洪武二年命使臣劉叔勉以卽位詔諭其國三年平定沙漠復遣使臣頒詔其王別里提遣使奉金葉表從叔勉獻方物賜文綺紗羅諸物甚厚并賜大統曆成祖頒卽位詔於海外諸國西洋亦與焉永樂元年命副使聞良輔行人甯善使其國賜絨錦文綺紗羅已復命中官馬彬往使賜如前其王卽遣使來貢附載胡椒與民市有司請徵稅命勿徵二十一年偕古里阿丹等十五國來貢

瑣里近西洋瑣里而差小洪武三年命使臣塔海帖木兒齎詔撫諭其國五年其王卜納的使使奉表朝貢并獻其國土地山川圖帝顧中書省臣曰西洋諸國素稱遠蕃涉海而來

難計歲月其朝貢無論疏數厚往而薄來可也乃賜大統曆及金織文綺紗羅各四匹使者亦賜幣帛有差

覽邦在西南海中洪武九年其王昔里馬哈刺札的刺札遣使奉表來貢詔賜其王織金文綺紗羅使者宴賜如制永樂宣德中嘗附鄰國朝貢其地多沙礫麻麥之外無他種商賈鮮至山坦迤無峰巒水亦淺濁俗好佛勤賽祀厥貢孔雀馬檀香降香胡椒蘇木交易用錢

淡巴亦西南海中洪武十年其王佛喝思羅使使上表貢方物賜賚有差其國石城瓦屋王乘輿官跨馬有中國威儀土衍水清草木暢茂畜產甚夥男女勤於耕織市有貿易野無寇盜稱樂土焉厥貢苾布兜羅綿被沈香速香檀香胡椒

百花居西南海中洪武十一年其王刺丁刺者望沙遣使奉金葉表貢白鹿紅猴龜筒玳瑁孔雀鸚鵡哇哇倒掛鳥及胡椒香蠟諸物詔賜王及使者綺幣襲衣有差國中氣候恒燠無霜雪多奇花異卉故名百花民富饒尚釋教

彭亨在暹羅之西洪武十一年其王麻哈刺惹荅饒使使齎金葉表貢番奴六人及方物宴賚如禮永樂九年王巴刺密瑣刺達羅息泥遣使入貢十年鄭和使其國十二年復入貢十四年與古里瓜哇諸國偕貢復令鄭和報之其國土田沃氣候常溫米粟饒足煮海為鹽釀椰漿為酒上下親狎無寇賊然惑於鬼神刻香木為像殺人祭賽以禳災祈福所貢有象牙片腦乳香速香檀香胡椒蘇木之屬至萬曆時有柔佛

國副王子娶彭亨王女將婚副王送子至彭亨彭亨王置酒親戚畢會婆羅國王子爲彭亨王妹婿舉觴獻副王而手指有巨珠甚美副王欲之許以重賄王子靳不予副王怒卽歸國發兵來攻彭亨人出不意不戰自潰王與婆羅王子奔金山浮泥國王王妃兄也聞之率衆來援副王乃大肆焚掠而去當是時國中鬼哭三日人民半死浮泥王迎其妹歸彭亨王隨之而命其長子攝國久之王復位其次子素凶悍遂毒殺其父并弑其兄而自立

那孤兒在蘇門答刺之西壤相接地狹止千餘家男子皆以墨刺面爲花獸之狀故又名花面國孫頭裸體男女止單布圍腰然俗淳田足稻禾穰不侵弱富不驕貧上下悉自耕而

食無寇盜永樂中鄭和使其國其酋長常入貢方物

黎伐在那孤兒之西南大山北大海西接南渤利居民三千家推一人爲主隸蘇門答刺聲音風俗多與之同永樂中嘗隨其使臣入貢

南渤利在蘇門答刺之西順風三日夜可至王及居民皆回回人僅千餘家俗朴實地少穀人多食魚蝦西北海中有山甚高大曰帽山其西復大海名那沒黎洋西來洋船俱望此山爲準近山淺水內生珊瑚樹高者三尺許永樂十年其王馬哈麻沙遣使附蘇門答刺使入貢賜其使襲衣賜王印誥錦綺羅紗綵幣遣鄭和撫諭其國終成祖時比年入貢其王子沙者罕亦遣使入貢宣德五年鄭和遍賜諸國南渤利亦

與焉

阿魯一名啞魯近滿刺加順風三晝夜可達風俗氣候大類蘇門答刺田落少收盛藝芭蕉椰子以爲食男女皆裸體以布圍腰永樂九年王速魯唐忽先遣使附古里諸國入貢賜其使冠帶綵幣寶鈔其王亦有賜十年鄭和使其國十七年王子段阿刺沙遣使入貢十九年二十一年再入貢宣德五年鄭和使諸蕃阿魯亦有賜其後貢使不至

柔佛近彭亨一名烏丁礁林永樂中鄭和遍歷西洋無柔佛名或言和曾經東西竺山今此山正在其地疑卽東西竺舊曆間其酋好構兵鄰國丁機宜彭亨屢被其患華人販他國者其人多就之貿易時或逃至其國國中覆茅爲屋列木爲

城環以池無事通商於外有警則召募爲兵稱強國焉地不產穀常易米於鄰壤男子薙髮徒跣佩刀女子蓄髮椎結其酋則佩雙刀字用菱葦葉以刀刺之婚姻亦論門閥王用金銀爲食器羣下則用磁無匕筯俗好持齋見星方食節序以四月爲歲首居喪婦人薙髮男子則重薙死者皆火葬所產有犀象玳瑁片腦沒藥血竭錫蠟嘉文簞木棉花檳榔海菜窩燕西國米菴吉柿之屬始其國吉寧仁爲大庫忠於王爲王所倚信王弟以兄疎已潛殺之後出行墮馬死左右咸見吉寧仁爲祟自是家家祀之

丁機宜瓜哇屬國也幅員甚狹僅千餘家柔佛黠而雄丁機宜與接壤時被其患後以厚幣求婚稍獲寧處其國以木爲

城酋所居旁列鐘鼓樓出入乘象以十月爲歲首性好潔酋所食啖皆躬自割烹民俗類瓜哇物產悉如柔佛酒禁甚嚴有常稅然大家皆不飲惟細民無藉者飲之其曹偶咸非笑婚者男往女家持其門戶故生女勝男喪用火葬華人往商交易甚平自爲柔佛所破往者亦鮮

巴喇西去中國絕遠正德六年遣使臣沙地白入貢言其國在南海始奉王命來朝舟行四年有半遭風飄至西瀾海舟壞止存一小艇又飄流八日至得吉零國居一年至祕得居八月乃遵陸行閱二十六日抵暹羅以情告王獲賜日給且賜婦女四人居四年迄今今年五月始附番舶入廣東得達闕下乃進金葉表貢祖母綠一珊瑚樹琉璃瓶玻璃盞各四及

瑪瑙珠胡黑丹諸物帝嘉其遠來賜賚有加

佛郎機近滿刺加古不知何國永樂時海外諸邦通中國者以百數亦未有其名自正德中據滿刺加地逐其王十三年正月遣使臣加必丹末等貢方物請封詔給方物之直遣之還其人久留不去剽劫行旅至掠小兒爲食已而黃緣鎮守中貴許入京武宗南巡其使火者亞三因江彬侍帝左右帝時學其語以爲戲其留懷遠驛者益掠買良民築室立寨爲久居計十五年十二月御史丘道隆言滿刺加乃勅封之國而佛郎機敢併之且啗我以利邀求封貢決不可許宜却其使臣明示順逆令還滿刺加疆土方許朝貢倘執迷不悛必檄告諸蕃聲罪致討御史何鰲言佛郎機最凶狡兵械較諸

蕃獨精前歲駕大舶突入廣東會城砲聲殷地留驛者違制
交通入都者桀驁爭長今聽其往來貿易勢必爭鬪殺傷南
方之禍殆無紀極祖宗朝貢有定期防有常制故來者不多
近因布政吳廷舉謂缺上供香物不問何年來卽取貨致番
舶不絕於海濠蠻人雜遝於州城禁防旣疎水道益熟此佛
郎機所以乘機突至也乞悉驅在澳番舶及番人潛居者禁
私通嚴守備庶一方獲安疏下禮部言道隆先宰順德鰲卽
順德人故濠晰利害宜俟滿刺加使臣至廷詰佛郎機侵奪
鄰邦擾亂內地之罪奏請處置其他悉如御史言報可亞三
侍帝驕甚從駕入都居會同館見提督主事梁焯不屈膝焯
怒撻之彬大詬曰彼嘗與天子嬉戲肯跪汝小官耶明年武

宗崩亞三下吏自言本華人爲番人所使乃伏法絕其朝貢
其年七月又以接濟朝使爲詞攜土物求市守臣請抽分如
故事詔復拒之其將別都盧旣以巨砲利兵肆掠滿刺加諸
國橫行海上復率其屬疎世利等駕五舟擊破巴西國嘉靖
二年遂寇新會之西草灣指揮柯榮百戶王應恩禦之轉戰
至稍州向化人潘丁苟先登衆齊進生擒別都盧疎世利等
四十二人斬首三十五級獲其二舟餘賊復率三舟接戰應
恩陣亡賊亦敗遁官軍得其砲卽名爲佛郎機副使汪鉉進
之朝九年秋鉉累官右都御史上言今塞上墩臺城堡未嘗
不設乃寇來輒遭蹂躪者蓋墩臺止瞭望城堡又無制遠之
具此所以往往受困也當用臣所進佛郎機其小止二十斤

以下遠可六百步者則用之墩臺每墩用其一以三人守之其大至七十斤以上遠可五六里者則用之城堡每堡用其三以十人守之五里一墩十里一堡大小相依遠近相應寇將無所容足可坐收不戰之功帝悅卽從之火砲之有佛郎機自此始然將士不善用迄莫能制寇也初廣東文武官月俸多以番貨代至是貨至者寡有議復許佛郎機通市者給事中王希文力爭乃定令諸番貢不以時及勘合差失者悉行禁止由是番舶幾絕巡撫林富上言粵中公私諸費多資商稅番舶不至則公私皆窘今許佛郎機互市有四利焉祖宗時諸番常貢外原有抽分之法稍取其餘足供御用利一兩粵比歲用兵庫藏耗竭藉以充軍餉備不虞利二粵西素

仰給粵東小有徵發卽措辦不前若番舶流通則上下交濟利三小民以懋遷爲生持一錢之貨卽得展轉販易衣食其中利四助國裕民兩有所賴此因民之利而利之非開利孔爲民梯禍也部議又從之自是佛郎機得入香山澳爲市而其徒又越境商於福建往來不絕至二十六年朱統爲巡撫嚴禁通番其人無所獲利則整衆犯漳州之月港浯嶼副使柯喬等禦却之二十八年又犯詔安官軍迎擊於走馬溪生擒賊首李光頭等九十六人餘遁去統用便宜斬之怨統者御史陳九德遂劾其專擅帝遣給事中杜汝禎往驗言此滿刺加商人歲招海濱無賴之徒往來鬻販無僭號流劫事統擅自行誅誠如御史所劾統遂被逮自殺蓋不知滿刺加卽

佛郎機也自統死海禁復弛佛郎機遂縱橫海上無所忌而其市香山澳壕鏡者至築室建城雄踞海畔若一國然將吏不肖者反視爲外府矣壕鏡在香山縣南虎跳門外先是暹羅占城爪哇琉球淳泥諸國互市俱在廣州設市舶司領之正德時移於高州之電白縣嘉靖十四年指揮黃慶納賄請於上官移之壕鏡歲輸課二萬金佛郎機遂得混入高棟飛薨櫛比相望閩粵商人趨之若鶩久之其來益衆諸國人畏而避之遂專爲所據四十四年僞稱滿刺加人貢已改稱蒲都麗家守臣以聞下部議言必佛郎機假託乃却之萬曆中破滅呂宋盡擅閩粵海上之利勢益熾至三十四年又於隔水青州建寺高六七丈闕敞奇闊非中國所有知縣張大猷

請毀其高墉不果明年番禺舉人盧廷龍會試入都請盡逐澳中諸番出居浪白外海還我壕鏡故地當事不能用番人旣築城聚海外雜番廣通貿易至萬餘人吏其土者皆畏懼莫敢詰甚有利其寶貨佯禁而陰許之者總督戴耀在事十三年養成其患而不問番人又潛匿倭賊敵殺官軍四十二年總督張鳴岡檄番人驅倭出海因上言粵之有澳夷猶疽之在背也澳之有倭賊猶虎之傅翼也今一旦驅斥不費一矢此聖天子威德所致惟是倭去而番尚存有謂宜勦除者有謂宜移之浪白外洋就船貿易者顧兵難輕動而壕鏡在香山內地官軍環海而守彼日食所需咸仰於我一懷異志我卽制其死命若移之外洋則巨海茫茫奸宄安詰制禦安

施似不如申明約束內不許一奸闖出外不許一倭闖入無
啟釁無弛防相安無患之爲愈也部議從之居三年設參將
於中路雍陌營調千人戍之防禦漸密天啟元年守臣慮其
終爲患遣監司馮從龍等毀其所築青州城番亦不敢拒其
時大西洋人來中國亦居此澳蓋番人本求市易初無不軌
謀而中朝疑之過甚迄不許其朝貢又無力以制之故議者
紛然然終明之世此番故未嘗爲變也其人長身高鼻貓睛
鷹嘴拳髮赤鬚好經商恃強陵轍諸國無所不往後又稱干
系臘國所產多犀象珠貝衣服華潔貴者冠賤者笠見尊長
輒去之初奉佛教後奉天主教市易但伸指示數雖累千金
不立約契有事指天爲誓不相負自滅滿刺加巴西呂宋三
國海外諸番無敢與之抗者

和蘭又名紅毛番地近佛郎機古不知何名永樂宣德時鄭
和七下西洋歷諸番數十國無所謂和蘭者其人深目長鼻
鬚眉髮皆赤足長尺二寸頤偉倍常萬曆中福建商人歲給
引往販大泥呂宋及咬啣吧者和蘭人卽就諸國轉販未敢
窺中國也自佛郎機市香山據呂宋和蘭聞而慕之二十九
年駕大艦攜巨砲直薄呂宋呂宋人力拒之則轉薄香山澳
澳中人數詰問言欲通貢市不敢爲寇當事難之稅使李道
卽召其酋入城與遊處一月亦不敢聞於朝乃遣還澳中人
又慮其登陸力爲防禦始引去海澄人李錦及奸商潘秀郭
震久居大泥與和蘭人習語及中華事錦曰若欲通貢市無

若漳州者漳南有澎湖嶼去海遠誠奪而守之貢市不難成也其酋麻韋郎曰守臣不許奈何曰稅使高家嗜金錢甚若厚賄之彼特疏上聞天子必報可守臣敢抗旨哉酋曰善錦乃代爲大泥國王書一移家一移兵備副使一移守將俾秀震齋以來守將陶拱聖大駭亟白當事繫秀於獄震遂不敢入初秀與酋約入閩有成議當遣舟相聞而酋卽急不能待卽駕二大艦直抵彭湖時三十二年之七月汛兵已撤如入無人之墟遂伐木築舍爲久居計錦亦潛入漳州偵探詭言被獲逃還當事已廉知其狀并繫獄已而議遣二人諭其酋還國許以自贖且拘震與俱三人旣與酋成約不欲自彰其失第云我國尚依違未定而當事所遣將校詹獻惠齋檄往

諭者乃多攜幣帛食物覲其厚酬海濱人又潛載貨物往市酋益觀望不肯去當事屢使使諭之見酋語輒不競愈爲所慢而案已遣心腹周之範詣酋說以三萬金餽案卽許貢市酋喜與之盟已就矣會總兵施德政令都司沈有容將兵往諭有容負膽智大聲論說酋心折乃曰我從不聞此言其下人露刃相詰有容無所懼盛氣與辨酋乃悔悟令之範還所贈金止以哆囉噠玻璃器及番刀番酒餽案乞代奏通市案不敢應而撫按嚴禁奸民下海犯者必誅由是接濟路窮番人無所得食十月末揚帆去巡撫徐學聚劾秀錦等罪論死遣戍有差然是時佛郎機橫海上紅毛與爭雄復泛舟東來攻破美洛居國與佛郎機分地而守後又侵奪臺灣地築室

耕田久留不去海上奸民闌出貨物與市已又出據澎湖築城設守漸爲求市計守臣懼禍說以毀城遠徙卽許互市番人從之天啟三年果毀其城移舟去巡撫商周祚以遵諭遠徙上聞然其據臺灣自若也已而互市不成番人怨復築城澎湖掠漁舟六百餘艘俾華人運土石助築尋犯廈門官軍禦之俘斬數十人乃詭詞求款再許毀城遠徙而修築如故已又泊舟風櫃仔出沒浯嶼白坑東椗蒲頭古雷洪嶼沙洲甲洲間要求互市而海寇李旦復助之濱海郡邑爲戒嚴其年巡撫南居益初至謀討之上言臣入境以來聞番船五艘續至與風櫃仔船合凡十有一艘其勢愈熾有小校陳士瑛者先遣往咬啣吧宣諭其王至三角嶼遇紅毛船言咬啣吧

王已往阿南國因與士瑛偕至大泥謁其王王言咬啣吧國主已大集戰艦議往澎湖求互市若不見許必至搆兵蓋阿南卽紅毛番國而咬啣吧大泥與之合謀必不可以理論爲今日計非用兵不可因列上調兵足餉方略部議從之四年正月遣將先奪鎮海港而城之且築且戰番人乃退守風櫃城居益增兵往助攻擊數月寇猶不退乃大發兵諸軍齊進寇勢窘兩遣使求緩兵容運米入舟卽退去諸將以窮寇莫追許之遂揚帆去獨渠帥高文律等十二人據高樓自守諸將破擒之獻俘于朝澎湖之警以息而其據臺灣者猶自若也

中爲鄭芝龍所破不敢窺內地者數年乃與香山佛郎機通好私貿外洋十年駕四船由虎跳門薄廣州聲言求

市其酋招搖市上好民視之若金穴蓋大姓有爲之主者當道鑿壕鏡事議驅斥或從中撓之會總督張鏡心初至力持不可乃遁去已爲奸民李葉榮所誘交通總兵陳謙爲居停出入事露葉榮下吏謙自請調用以避禍爲兵科凌義渠等所劾坐逮訊自是奸民知事終不成不復敢勾引而番人猶據臺灣自若其本國在西洋者去中華絕遠華人未嘗至其所恃惟巨舟大砲舟長三十丈廣六丈厚二尺餘樹五桅後爲三層樓旁設小廳置銅砲桅下置二丈巨鐵砲發之可洞裂石城震數十里世所傳紅夷砲卽其製也然以舟大難轉或遇淺沙卽不能動而其人又不善戰故往往挫衄其所役使名烏鬼入水不沈走海面若平地其舵後置照海鏡大徑

數尺能照數百里其人悉奉天主教所產有金銀琥珀瑪瑙玻璃天鵝絨瑣服哆囉噠國土旣富遇中國貨物當意者不惜厚資故華人樂與爲市

